


文苑集

欽定四庫全書

文莊集卷八

宋 夏竦 撰



表

謝天慶節御筵表

臣某言元符紀序恭館示慈仰戴恩榮俯增震慄伏惟
皇帝陛下齊心靈寶結念洞章結真緒之延鴻敞密都
之神麗順發春之初吉薦有帝之強名奉鏤玉之珍文
秘凝雲之峻閣言旋詔蹕式屬慶辰乃眷攸司爰頒寵

宴挹流霞之醇旨咀芳蒞之馨香雖共遂於屬厭寔愈增於寅畏誓更勤於淬礪用仰答於照臨

謝賜御製真遊頌表

臣某等言伏蒙聖慈賜臣等御製真遊頌一首者中禁延真誕章於寶緒西清繹思濬發於乾文仰荷寵頒伏增榮感謝中伏惟皇帝陛下淵明天縱睿哲日新達虞舜之四聰茂周文之九德元符申錫丕顯於眷懷盛節交修宣臻於明察是以皇穹報降真祖下臨諭長祭之遐源示聿懷之密命簡冊肇崇於嶽稱樵蒸式展於上儀崇慶節以載嚴肇真宮而克謹洪惟秘殿實佇仙遊將永紀於鴻禧必載垂於金刻臣等不量淺識竊貢陋聞願裁雅興之辭用廣欽崇之意果蒙睿造俯徇至誠罄欽翼之清衷著游揚之嘉頌叙乘雲之妙化述感電之明靈昭兩儀是輔之祥顯二聖克開之祐將載刊於穹石爰出賜於下臣日月並明降鴻輝於聖域河洛開奧分寶字於私闈宏圖寵極朝倫榮深望外願息私而莫報

惟忭蹈以增榮

謝賜御製真遊殿頌表

臣某等言伏蒙聖慈賜臣等御製真遊殿頌一軸者碧輦乘風載臨於夙禁寶跗擣藻澹發於雲章仰荷頌宣俯增榮懼中謝伏惟尊位皇帝陛下多能攸縱典學惟新法堯帝之安安體周王之翼翼赤文綠字申錫於元符蒼壁黃琮交修於盛節虛皇乃眷飈御下臨議積累之遐源示顧懷之景命協吉肇尊於徽冊升禋式薦於明誠紀慶節於令辰肇靈宮於福地洪惟秘殿實降元真仙衛雖迴天香尚霽亟徇封章之請庸增棟宇之規遂易鴻名式新題榜躬著游揚之頌誕昭欽翼之心叙駕羽之至神贊合符之明德宣二聖緝熙之道播兩儀顧望之祥將再勒於堅珉爰出頌於近列臣等親逢旦暮曲荷恩私列緯成文方騰於聖域慶雲垂彩忽被於私門徒瞻倬彼之明莫測煥乎之盛唯珍藏而知幸固圖報以無階慶抃兢榮倍萬倫等

謝賜御製文表

臣某言雲漢之文肇加於銓次圖書之府遽奉於頒宣
實典守以為榮固寶藏而斯幸中謝伏惟尊位皇帝陛
下靈承乾則欽翼帝圖當四貊之來同顧萬幾之多暇
叩真樞而訪道闡藝圃以游心爰時敏於厥修用克昭
於將聖由是博觀篆素包舉藝文當乙夜之凝嚴遇西
清之間晏必憲章古昔嘉歎祥祺薰勵翼之清衷美光
華之時景宏敷睿藻亟發宸章屢移銀箭之聲繼竭金
壺之墨用發揮於九德實經緯於兩儀玉音常溢於絳
臺藥簡載盈於綠蘊暨合祛魯嶽奠痊魏睢述祖祐之
鴻猷叙天人之元命紀山川之勝勢贊仙釋之神靈潛
運天材並馳宸翰銀書金刻爛雲景於名區玉籥朱弦
播咸韶於樂府令輔臣之擬議俾史氏以編聯辨六樂
之音容序五辰之躔次公車奏御方載飾於芸籤冊府
爰頒俾分藏於金匱臣等叨塵近職獲備攸司被慈旨
以知榮啟寶題而竊抃並義文之象繫永鎮書林冠堯

舜之典謨遐光聖域載惟慶幸倍萬常均

謝和御製詩表

臣某言景毫靈區再登於嘉瑞薰弦妙韻遽播於宸章
叨下濟以知榮奉乃賡而增愧中謝伏惟尊號皇帝陛下
寅威密命誕服慶基祗接真游誕膺於寶誨丕承道蔭
茂集於繁禧眷惟指李之鄉昔構猶龍之館將潔誠而
嚴祀爰先置而戒期偉兆有開柔靈獻祉仙檜重芳於
福地嘉苗再實於良田矧茲刈獲之家允叶聖真之緒
載敷神唱恭述靈心煥彼簡編永著自天之祐薦於郊
廟遐宣治世之音臣幸預近司叨頒睿藻私門傳寶仰
欽雲漢之章燥吻微辭謬續栢梁之韻共循荒陋彌積
兢慚

謝宣召觀聖像表

臣某等言真馭俯臨載形於繪事宸慈曲被俾預於榮
觀載瞻章漢之文共積逢辰之幸中謝伏惟尊位皇帝
陛下欽順景靈務昭於翼翼紹宣先烈載極於蒸蒸自

備受於元符實交修於盛節皇穹是輔密命有開降雲
襪於中宸諭璿源於太古簡冊肇尊於徽號樵蒸式展
於鴻儀而睿志彌虔精心允迪爰令哲匠恭寫睟容玉
相金姿凝嚴而如在瑞雲仙衛炳煥而咸分爰形美述
之文祇叙降真之蹟用極形容之妙誕昭積累之祥臣
等獲總樞機親逢旦暮曲荷聖明之睠獲瞻繪素之儀
載仰威靈共增榮感更誓自公之節少酌逮下之仁

謝賜御製冊府元龜序表

臣某等言伏蒙聖慈賜臣等御製冊府元龜序者東觀
細書用成於國典西清覃思濬發於乾文革舊日以垂
鴻冠羣篇而作範共循榮遇孰可稱言伏惟尊位皇帝
陛下審聽高居繼統揚業多能天縱仁聖之事既該嘉
言日章帝王之道大備總六經而觀法崇四術而教人
貴敦學之風右藏書之府補綴漏逸修起廢遺禮樂備
於朝廷弦誦盈於庠序施溫雅之號令四方唯寧垂深
厚之訓辭百工用乂頃穆清之多暇稽雅故以鋪觀考

邦國之大倫見君臣之往躅紛綸寡要沮勸無章將區別於源流俾辨明於淑慝爰發聖詔申命下臣陳廣內之圖書給蘭臺之筆札發凡起例當類聚以羣分原始要終必備言而廣記旌小善而咸錄過大惡而勿揚極惟聰垂教之規適太上立言之體而臣等藝能淺陋頌次顛蒙但祇稟於聖謨莫建明於大義至於舊章參互衆意異同旌別遺方推揚垂當皆賴發揮之旨方成倫理之文既歲月以滋多顧簡編而僅就恭惟序引實總綱條苟非述自宸衷加於藝圃則何以炳皇王之軌範昭臣子之楷模遂列奏於公車願飛英於聖域果蒙聖造俯徇羣心擣章漢之睿辭振經天之懿律兼條總貫致遠鈎深紀烈祖之靈圖叙神宗之大訓輯羣元而精密敷輿理以昭融典謨立而書教宣乾坤設而易道備恭聞睿旨克暢先猷蓋曩處於震宮爰日趨於幄坐欽承諄誨丕闡宏規將以考歷代之遺音建一王之茂範著於編紀昭示勸懲惟聖作之有開屬昌辰之善繼周

武能述式廣於丕圖陶唐乃文彌恢於至德而乃特紆宸慮肇建鴻名昭鑒戒之大猷顯欽明之精意首青編而有耀題紺帙以惟新豈獨翰墨之榮俯加於多士固乃文思之德永被於生民凡同測筦之闕共積逢辰之幸歡呼抃蹈倍萬等倫

謝宣赴龍圖閣觀芝草慈烏表

臣某言賴鄉先置並獻於千祥內閣榮觀首私於四近殊尤夔異歎誦何勝中謝竊以芝產九莖聞彼漢房之典烏生八子傳諸秦桂之歌詎有時萬凝祥方冬載育蓋式昭於茂祉實允屬於昌辰伏惟尊位皇帝陛下虔鞏臨民寅威順帝法陶唐之稽古專講於舊章體高陽之潔誠宣臻於盛節接真游而允穆尊妙道以尤崇眷惟指李之墟昔屬猶龍之館靈心有朕方致於精衷黎首聿臻願修於明祀爰咨近輔經始神區當備物之初辰變載陽於受景天和茂暢地寶交騰茁彼靈芳叢生福地固彌川而億計亦賦象以千名矧返哺之慈禽競

巢而乳穀宣昭協氣茂發鴻禧亟披藝而考祥遽置郵而承獻肅陳中禁既凝穆而載闕嚴召近司俾周旋而審覲示休嘉之砰隱彰見象之日昭臣謬備樞衡親逢旦暮共膺絲旨仰奉睿祺瞻菌蠢之英如游於台嶺俯畢逋之狀若對於羲輪蓋盛德之曠分感殊微之蠶涌祇迪天人之際實惟明聖之符抃蹈欣榮倍萬倫等

謝賜大酺詩表

臣某言伏蒙聖慈賜大酺詩者堯酒推恩誕均於純錫舜絃流韻祇述於繁禧遽叨拜賜之榮實積逢辰之幸中謝伏惟尊位皇帝陛下惠和洽物恭儉愛民祖武宗文紹宣於馨烈尊道貴德丕顯於大猷惟上帝之碩懷感真游之降格示克昌之詒訓諭長發於鴻源陽位升煙聿修於嚴報中衢置酒務洽於多歡屬煦日之載臨考舊章而斯啟玉籥均和珠躔宣麗昭三神之景祐洽萬國之歡心臣幸豫近司叨頒睿藻聞韶率舞徒欽善美之音測筮仰闕莫達高明之體惟銘藏而知幸固補

報以無階

謝批答允賜御書表

臣某言玉宸觀像肇啓於殊庭雲漢分暉仰承於俞詔
中謝伏惟尊位皇帝陛下參俾闔闔包舉藝文陰偶陽
竒玩義文而滌慮天五地六憲周德以宣英鼓聖域之
芳風騁書林之珍駕流徽金石鋪藻縑緗妙萬化以為
言布羣方而成誦矧清都之載敞惟上士之咸依但瞻
曲密之規未識昭回之采臣等幸逢嘉會誤備攸司
再竭丹情仰祈睿製滢河開奧預降於絲言恭館凝祥
將藏於鳳蘊佇導迎而協吉唯舞詠以知榮

謝賜御書表

伏蒙聖慈以臣所乞御書特蒙頒賜者昭回散彩方謝
於頒宣雅奧垂文載形於敷諭捧窺滢林循省震惶中
謝恭惟尊位皇帝陛下上德淵冲聖謨光大體雷雨之
甘潤象日月之昭明成茲既富之民被以乃文之化每
裁制於物力致蕃衍於貨財竊惟內府之興實自先朝

之畫皆以節用於已圖儉於豐收六尚之美羸為九年
之預備至於優賞降附臬翦寇戎厚慶賜於勲勞廣鴻
儀於祭享國有經費民無暴征允屬昌辰益隆先訓况
復方隅罷警年穀順成貨殖阜通京坻饒衍務省乘輿
之服御愈豐帑藏之資儲爰命增修以登輸委復徇史
臣之請特搗神筆之文述儲峙之通規昭祖宗之懿範
鸞龍奮藻雲漢為章固宜刻石填金並三辰而垂耀
經天緯地冠九德以流芳成湯篆刻於盤于孟夏后鏤銘
於箕簋莫擬範圍之妙徒居象繫之先臣叨備攸司誤
蒙殊眷慚對天而測管固游聖以無階自慶遭逢彌增
踴躍遂奏尺牘以陳寸誠豈謂鴻私俯頒優詔穹昊不
宰惟下濟於光明螻蟻無能難上酬於覆露但持頑朽
少效涓塵

謝賜生日羊酒米麵表

臣某言函詔垂文簋羞異數循惟榮會內積感悰中謝
竊以宴餼之私殮牢有等本周官五藪之給及漢耐上

尊之良務勸賢庸俾從禮食矧近庭之備列繇誕日以
將恩事出先規名存彛範如臣者起於羈馭早竊盛名
以斐章而潤帝言以淺識而參內務不稼而取禾百億
每媿素飡縣弧而有志四方洊逢嘉序感念肯堂之訓
聿深轉轂之悲豈謂伏蒙尊位皇帝陛下曲禮空辱特
延賚及降使瑞於禁闈輟膳具於君庖鼎爨踰豐觴壘
有衍會里中相愛之舊共喜屬厭備俎間決勝之謀何
階補職惟誓竭忠之効庶為圖報之期

謝賜衣著銀器表

臣某言今月二十一日伏蒙聖慈特賜臣衣著五十匹
銀器五十兩者鴻私俯及蕃錫有加拜賜已還循涯增
愧中謝伏念臣幸逢運會誤玷官常自對問於嚴宸洎
備員於諫省最為孤進盡出異息常感慨以無從冀傾
心而自効服勸夙夜勤况瘁簡編仰誦睿文虔遵聖誘顧
顛蒙之有素終篆刻以非工近者法御戒塗真區薦玉
獲掌坤儀之奏謬裁帝子之章屬辭雖極于寅恭足意

莫臻於平徹靜思蕪累靡敢起居豈謂伏蒙皇帝陛下
逮下敦仁包荒著象慮冰淵之積悚頒器幣以推恩輝
耀里閭榮周族屬敢不竭心竹素誓節松筠更增時螽
之勤仰答菁莪之育兢惶感抃倍萬常均

謝皇太后賜生日禮物表

臣某言星闈遣使芝檢申恩恭拜貺以懷兢仰逢辰而
累抃中謝恭以國家推宴好之式用廣惠慈念臣鄰之
勞克先體貌加禮有陞庶之峻陪餐從壺豆之差務致
便蕃用為旌勸伏念臣本惟材譎夙稟性愚濫竊清階
屢登華貫誤備國樞之選得聞君幄之謀屬中火之在
辰協左弧之記日溫言嗣獎厚餼旅陳芬庖具於七牢
湛栢醇於九醞比蓋伏遇皇太后陛下深矜昧進俯注
神襟謂先聖之舊規本於慎守眷適庭之備位亮乃無
他曲沛褒章實為榮遇坐累茵而不逮但感思親食四
簋以加豐彌銜序舊敢忘盡瘁庶用竭忠

上太皇太后賜生日禮物表

臣某言伏蒙聖慈以臣生日特降詔書賜臣羊酒米麩者使駢臨蒞詔語溫純出上賜之便蕃溢家庭而焜燿中謝伏念臣適時無取釋道不明僅有小忠誤叨大任濫賦千鍾之祿未施四體之勤敢謂皇慈記其生旦預頒分於居第俾難老以在庭恩厚不貲命微莫稱此蓋伏遇太皇太后陛下至誠好禮以道任官顧新政之方行雖舊儀而不廢因加多物曲示隆恩君賜有餘恐奉親而莫及公朝無諱誓報國之為先

樞密院謝宣召宴游表

臣某言仰承嚴召久侍中宸共戴慈榮伏增感抃中謝伏惟尊位皇帝陛下誕鍾嘉會懋建遠圖祇適詔諸謨茂昭於孝德欽膺秘籙交舉於盛儀既朝曲里之祠繼畢園壇之禮蕃禧允茂大慶方均當春日之載陽屬萬幾之多暇遽宣慈旨式詔近司趨廣內之層闈仰先朝之睿札金騰乍啟畏軒臺如在之靈綉帙載瞻契周鼎下年之數加以聖明善繼琬琰垂文列典籍以星繁播聲

詩而玉振亟由亭榭再歷巖巒睇層閣之相望矚羣芳之邈遂奉威顏之睟穆從天步以遲留屢承列席之觀爰奉流觴之宴餼菽汭而繼至龜龍刻鏤以載浮投芳餌於文竿對叢枝於米檻移晷共聆於雅奏洗心載仰於宸章矧竒石之羣分有睿辭之徧紀或垂金版或麗翠珉昭回之采交輝清越之音相入而又示慈琳殿拜賜瓊跗法酒九行奉神歡而愈洽晝日三接承寵睭以彌隆洎復私門恍如宵寤昔壺中嚴麗長房但舉於甘肴帝所樂游簡子止聞於廣樂何親逢於旦暮且事絕於名言共揣庸微曷勝優暇咏鹿鳴之什既誓於盡忠歌天保之章更祈於報上兢榮感媿倍百常均

謝賜御書并御寶表

臣某言今月五日入內內侍省内侍殿頭楊餘懿到州伏蒙聖慈賜臣御書文字御寶封全者孤寒際會早奉於龍潛睿哲哀憐遠頒夫寶篆兢榮拜賜感懼交懷中謝伏惟皇帝陛下典學生知聖能天縱自東華之毓德

宣先聖之詒謀博貫七經誕彰百行仰屬代明之始彌隆繼志之心躬決萬幾兼該六藝矧乃飛毫之妙尤精拂素之書回鸞鳳於筆端越天人於意表俄成寶字遠錫舊臣念犬馬之前勞慰江湖之遠宦齊心仰止若對於威顏舉族自量何勝於聖念

謝賜獎諭襄州日公政詔表

臣某言伏蒙聖慈以襄州奏天禧四年中民食荒歉賊盜相乘臣在任勸誘得斛斗一十一萬石救濟得饑民四十六萬一千三百餘口等事特賜詔書獎諭者孤臣自勵偶著於微勞聖念過深特頒於溫詔退自惟省罔措心顏中謝伏念臣頃歲襄樊庶民饑饉聚而為盜烟火相望繫以議刑獄狴充塞猥當綏撫之職合思拯濟之方乃置醇醪躬觴右族諭以朝廷之意貸其廩給之餘並遣屬僚分餼流冗煩使軒之上狀蒙臺敕以垂褒伊俾後人遂刊於石歲當再閏郡有彛章爰敷述於奏封請肇編於地志伏遇尊位皇帝陛下惠深求舊政切

愛民念茲侍從之臣嘗罄忠勞之節璽書歎賞式勸於
在公芻效瑣微曷勝於云補惟期况瘁少謝鴻私

謝皇太后表

臣某言伏蒙聖慈以襄州奏天禧四年中民食荒歉賊
盜相乘臣在任勸誘得斛斗一十一萬石救濟得饑民
四十六萬一千三百餘口等事特賜詔書獎諭者薄效
誤聞中宸迺聽特垂獎飾伏積兢榮中謝竊念臣徃自
宛穰臨於漢沔當荐饑之凶歲聚食之流民寇劇生郊
餓殍橫路頗聞易子事迫於圖生雖欲峻刑理難於弭
患爰陳盛食悉召豪宗諭朝廷之愛人貸困倉之滯穀
亟令調餼獲濟疲羸安知行路之謠誤中輜軒之采猥
煩臺禮曲盡哀褒維彼編氓刊諸樂石屬更閏曆將載
於郡圖式案彛章先形於奏牘豈謂伏遇尊位皇太后
陛下仁惟樂善政在任能念茲孤賤之臣頗稱循良之
選俯頒中詔用獎前勞敷勸萬區務恢於大體顧慚微
物曷稱於鴻私惟冀夙宵少疇省錄

謝恤刑詔表

臣某言伏奉詔命云朱火揚威適臨於炎燠紫宸興念深惻於係縲爰勅庶邦俾清幽囹渙恩遐被蠢類相中謝伏惟尊位皇帝陛下湯德日新堯仁天覆法約三章之要明見萬里之微當天序之蘊隆慮國刑之淹久乃頒溫詔用戒守臣示欽恤於聖懷俾肅清於滯訟臣叨司留鑰恪奉化條當天下在宥之朝守君子盡心之訓庶無苛刻上副哀矜云

南京謝減降勅表

臣等言今月二十八日侍御史張沔到府准勅原減見禁罪人者臺理布恩大刑遞降府僚行縣輕繫畢除隱賑日畿滲漉春澤中謝恭惟皇帝陛下寶慈體道為惠效天軫輦轂之劇繁慮係縲之幽滯黃雲書出式傳籥動之祥紫幄齋居恣宥鼎書之罪矧伊瀍之西闕洎睢渙之下都凡有罹辜亦從未減使車冠豸肇復於漢行丹筆漏魚盡開於湯網臣等幸居官守獲奉恩章抃躍

之誠倍百倫等

欽定四庫全書

文莊集卷九

表

進和御製豐年歌表

臣某等言禁苑登豐于首種薰弦濟發于宸章媿非臣
和之材猥奉帝庸之作中謝伏惟尊位皇帝陛下惠和
布政勤儉化人式昭務本之心克謹授時之教唯豐地
利以厚民天將遠察于農時在近觀于穡事顧金華宥

密之地有鈎盾宴游之田申命攸司播時宿麥瑞雪屢
滋而吐秀景風潛扇以垂黃乃駐乘輿臨觀刈獲嘉如
坻之倍獲知率土之咸豐爰均賜于近臣遽誕宣于睿
唱昭覆載至仁之意播咸韶盡美之音臣等素乏藝文
誤塵清要幸奉緝熙之德猥叨賡載之榮遊聖無階但
仰昭回之象鏤冰曠日僅成蕪累之辭將瀆凝嚴預增
慚愧

和水清木連理詩表

臣某言嘉瑞游臻方深於慶抃宸章濬發忽預於賡颺
載省庸虛惟增隕越中謝伏念臣等藝能膚淺性識顛
蒙幸會休明誤塵甄獎日奉好文之德親承善教之言
在刻志以彌勤顧遣辭而愈拙此者伏遇尊位皇帝陛
下欽崇六藝顧謨三靈法陶唐之率常稽夏后之象物
欽修聖統昭式天才昨自玉牒上封金枝西祀鴻休四
發瑞命綸紛靈稔下流嘉生茂遂矧茲竒木載擢祥枝
當獻歲之良時式符於熙盛對清心之秘殿雅契於隆

平用丕顯於景靈遂宏宣於睿唱廻五辰之藻麗綴四
始之芳蕤固將金字銀書遐光於篆素朱干玉籥永被
於聲歌臣等幸預榮班叨聞妙韻遽命巴歛之作載賡
韶濩之音雖牽率而僅成固涵堙而仰止况翔陽之下
久銷螢燐之光豈建木之陰可耀蒿萊之質預增愧慙
尤切競惶

進和御製占城國貢師子詩表

臣某言瑞獸來庭薰弦發唱獲繼帝庸之作實非臣和
之材載省踈蕪但增慚慙竊念臣叨塵官序際會文明
莫勤日益之功徒奉化成之德此者伏遇尊位皇帝陛
下言惟妙物道實通微懿文德以經天靡聖風而柔遠
負茲荒服承獻靈猊用昭式於休光遂敷施於睿藻協
筦弦而振律潤竹素以垂鴻造物之功尋措模之可究
秉陽之象仰躔次而可觀臣叨奉恩私俾令賡載但覃
研之精爽唯罄竭於頑駑用綴蕪音少疇天獎上塵旒
纈唯積憂兢

進河清賦引表

臣某言竊覩祀汾陰經度制置司陳堯叟奏黃河清于保平軍者伏以惟德是輔三世其昌俟河之清一旦斯至光昭宗社之慶煥發天人之符臣某中謝恭惟尊位皇帝陛下茂大中之功隆太上之德本支百世磐石非堅壽考萬年南山未永制禮作樂類帝禋宗六龍將幸於汾祠九曲載清於陝服儒宮獻頌學館陳詩臣雖典豆區叨親簡謀極言中選曾叨多士之間奏賦歌詩敢繼大夫之後仰干震耀懼切冰淵

上景德五頌大中祥符頌引表

臣某言准中書劄子奉聖旨依奏令進景德五頌并大中祥符頌者下臣有請傾匪石之丹心上帝曰俞降如絲之睿旨震惶無所欣媿踰涯臣誠感誠懼頓首臣聞靈鳥升歌告湯孫之景貺昊天著頌美周室之成功被以管絃薦之郊廟振明光于萬世昭茂實于三儀爾後王道陵遲頌聲彫缺非曠大夫之職豈無博士之官蓋

成命未融則斯文不作我國家圓方右序中外穆清撥
五代之亂離繼三皇之昭夏黼黻冠冕正列采而象乾
坤控揭壘簾廣德音而事祖考恭惟尊位皇帝陛下春
秋鼎盛聖睿日躋御天球及河圖受元符與黃瑞英聲
蜂涌惠露春流承龍翼于咸平致鴻鈞于景德北戎震
疊泥首幽并左蠹雍容朝陵鞏洛著訓農之懿典頌勸
學之彞章澤浸幅員仁翔海外文武際天而接地靈祇
流慶而發祥介瑞星辰告休符籙冠黃虞之故實掩唐
漢之聲明道通九夷執玉萬國考典墳而未有極翰墨
以難名巍乎皇乎廣矣大矣當是時臣工清廟詎可以
美形容金牒玉函豈足以昭姓氏太史珥筆不暇紀豐
功良士在庭未能歌至化豈臣庸昧敢頌清明蓋念胄
緒孤平藝文淺陋遭逢陛下拔擢流中為萬乘之門生
登六科之內第隸官膳寺將命南州雖竭慮以安民奈
無階而答祿臨文振袂撫劍馳魂幸齒髮之未衰冀君
王之可報以是區分簿領刻念典謨極精爽之再三頌

猷徽之萬一欲輸塵露少擬聲詩遂昧死而獻言方伏
應而待罪恭惟陛下恢崇至聖敦勸素風無言不讎無
德不報迴曜靈之列景照時藿之至心特降綸言爰從
奏請敢不擬子淵而匠意倣吉甫以裁章飾陋彫頑間
旒瀆續伏願皇帝陛下念臣嘗叨天獎曾近帝暉當垂
拱之餘時遇觀書之暇日曲迴宸鑒少聽蕪音寬楛斧
之嚴誅軫昆蟲之微意百世斯幸萬死甘心抑又聞英
主難逢良時罕遇河圖不至宣父興嗟岱岳未封相如
馳恨臣常自慶生寔奉辰既踰弱冠之年便遇泥金之
禮在于今日萬世一時苟不能目覩陶匏足升壇墀以
斯為士曷若無生今陛下丕奉珍符恭行大典適遂羣
生之欲豈違庶品之誠願令臣隨一體官執一祭器鳧
抃徐鑾之後駿奔緹騎之間瞻雲瑞于封中聽神聲于
岳下伴禽魚而舞躍隨耆幼以謳歌時頌鴻徽上疇靈
澤是則死當不朽生有餘榮永念丹誠有如皦日臣無
任瞻天望聖激切懇禱之至

進王中正神道碑表

臣某言伏奉聖旨令臣撰贈鎮南軍節度使王中正神道碑者密命開先實異人之傑出溫珉紀事顧惜學以非長將仰瀆于穆清但預增于震悸中謝伏以王中正早緣靈契仰對真游通宥密之嘉言啟龐鴻之聖佑繼成慎默稽往哲以難偕茂實殊尤考前編而未覲蓋邦家累盛感竒偉之間生昭紀遺芳合歸鴻筆如臣者文非約史學不傳經當先臣畫節之初總需一命洎制策

叨榮之後方越十年獲起草於東宮叅代言於西掖雖編研而自勵終駑蹇以難稱每慚菲薄之才孤奉文思之德在於昧進久已逾涯豈謂伏蒙皇帝陛下不以䟽賤棄遺不以顛愚為罪過垂慈惻曲記清衷旌彼功庸憶其姓字是頒慈旨俾勒瓊趺展一人特達之知固千載為儒之幸雖磨鉛而僅就顧刻鵠以非工重念臣最處孤平加之拙直唯竭心而荅祿恥令色以從人夙夜端憂莫避入朝之嫉聖明大庇獨承如地之容敢不倍

勒箴銘更探油素誓畢蟻蜂之命仰疇天地之仁

進謝恩物引表

臣某言伏以崇真齒冑雲構相望紀事披文天章益煥
典司知幸榮慶交深中謝恭惟尊位皇帝陛下天縱多
能通微作聖鴻猷備舉極孝奏之儀典學日彰布睿明
之德昨以欽崇祕籙肇建殊庭啟神麗之規旁臨東闕
奉馨香之薦仰佇左飈爰以賢王方從外傳肇堂皇而
密邇庶祉福之來同而皆躬運寶跼親裁宸制叙九清
之道蔭允罄於精衷稽三善之格言但馭於實訓繼刊
金刻並建龜趺羲舒之彩交暉咸韶之韻相入是知百
靈潛衛永鎮於皇居太一下觀將傳於紫筆臣仰逢亨
會早竊殊恩忝預攸司親逢能事雖乾坤惟大固無可
報之階而芹菽至微或盡告虔之懇兢惶抃蹈倍萬常
鈞

乞與修真宗實錄表

臣某言伏以緝熙盛節先聖之鴻徽細繹信書孤臣之

舊職異殫薄枝少謝遺恩仰瀆諒陰伏增震悸臣某誠
懇誠懼頓首頓首竊念臣材命竒薄門族悴寒頃事先
朝最承華寵對問軒陛擢自諸科第念庸微久陪法從
旋以上封納爵詣理代親事敢自明誼當引罪先皇帝
恫矜孝養昭式禮經抑去空文比用寬典裁令出守趣
使知非臣敢不夢寐惟憂夙宵咎痛使食當去亦異改
為儻心可銘不難自剋庶伸尺寸漸積歲年贖一眚於
前辜答萬分於再造何圖憑几遽迫遺弓云補無辰攀
號罔極恭以真宗皇帝躬訓慈儉顓講藝文拓邃古之
皇衢剡叔世之霸軌澤浸九域雨潤而雲游威憚四夷
風翔而電照臨民先悃幅之吏防邊後忿驚之臣恭默
道樞偃仆武節長養萬物休息羣生由是瑞命薦臻上
儀交舉紀姓垂鴻之典煥衍於蒼珉侯日疇聖之符充
溢於金匱仰對在天之烈莫先垂世之書必當遴簡時
材章叙實錄禮文至盛注記尤多誠須博集簡編廣分
卷第宜有冗吏以備後陳重念臣頃在往年常叅史局

太祖皇帝大功美業幸預於編研太宗皇帝盛德嘉猷繼叨於頌次成書未幾急景難留當時史官迭為異物唯臣與晁迥二人尚存臣雖出典五城連更六祀棄置刀筆奔走泥塗溫故無由屬言多廢若乃先聖發明之類例朝家經濟之規模靡敢暫忘粗能追憶僮使編聯事實繫叙日時庶能上給英儒廣資鴻筆宣贊風美煥燦古今式効涓誠仰疇餘烈伏望皇太后陛下布昭宸鑒祇適詒謨哀報國之危衷委容輝之末照念臣先聖寵綏之日振拔為優皇帝潛躍之初遭逢最舊特垂開可許以報投詎敢銜鬻非材微冀誤寵僮俯容於竭力乞靡預於疇勞終獲成編即求為郡永罄樸忠之節仰酌簡照之私

乞御製君臣事迹序表

臣某等言臣聞易象始脩文王作乎繫辭典誥既刪宣聖制其書序矧發揮於大典實繫賴於睿文將瀆凝嚴預增戰越臣某中謝伏惟皇帝陛下惟聰天縱將聖日

躋圖範二儀博通於機會憲章六藝妙達于精微崇四術以化人鑒百王而立制考藏書之閣墜簡咸收頒勸學之言素風大洽頃以西清多暇乙夜無遺覽篆素之前編見君臣之往躅絲綸悉紀懲勸罔分濬發宸衷誕敷聖詔命近臣而紬繹選多士以刊修類聚羣分各從於軌範彰善瘅惡永別於否臧固懋德之洪規實經天之至訓臣等誤膺甄擇俾預校讎雖抱槧和鉛共勤于素業而兼條總貫動稟於睿謨至于衆議之未通舊文之多誤損益之非當褒貶之失中皆自發明方成義例顧屢於時序將甫就于編聯為聖代之大謨垂千齡之彛制竊惟序引實總淵源若冕之在躬為服章之表如繭之抽緒開組織之端苟非睿辭豈容輕議其君臣事迹伏乞聖慈特賜御製總序加於編首式昭下濟之輝永播化成之教豈獨儒林之榮觀寔為聖域之令猷願迴從欲之恩特允至誠之請

乞降御製御書於昭應宮表

臣某言竊以殊庭肇啟載嚴曲密之觀上士咸臻未識
昭回之采合仰祈於帝製奠永暢於真風臣誠懇誠願
頓首頓首伏惟尊位皇帝陛下學本生知聖惟天縱布
安安之化率育於羣黎宣郁郁之文紹隆於先志而自
增高云岱報本河汾朝氣祖之睟儀歷省方之靖館感
鴻禧之茂委敷睿思以誕彰凡屬神明之區徧垂金玉
之刻至若頌宗範於藏書之閣紀元符於錫瑞之門刊
寶訓於東庠叙嘉猷於內府發慈悲之大願著告戒之
宸辭篇溢西清卷盈東壁固以發揮經教疏暢化源激
雅俗以還淳道懷生而底善况靈宮之既就翳羽服之
攸依苟共遂於瞻虔實倍增於榮慶伏望聖慈特賜御
製御書曾賜臣寮者各一本於玉清昭應宮集禧殿左
右鋪掛收掌許道衆觀仰是奠鈞天祕邃常聆九奏之
音紫府深况永煥八龍之篆精虔懇至實倍常鈞

乞依諫官抗議表

臣某言伏奉聖慈賜臣詔書示諭為諫官上言任福等

陷沒臣指蹤不明乞降官序朕方責以後功寢茲抗議者偏師失律方沮軍聲祕檢延慈猶寬吏議感深淪髓媿極無顏中謝伏念臣出自書生罔諳羌事誤填邊瑣再從軍屯既陳力之不能屢上封而請代不圖宸造靡訊無功俾旋闕輔之故棲盡付邊防之重委主憂臣辱在寢食以皆忘恩重命輕誓死生而必報以是經營戰守約束偏裨令極五申中心交萬慮適屬犬羊侵境貔虎聚營十舍相遙雖指蹤之匪及一時極選顧授將以頗精何期臨敵貪功無謀應變聽我鵠鶴稔茲豺狼職在於臣咎將誰執爰露章而自劾祈麗事以繩違豈謂伏遇尊位皇帝陛下深軫上仁恫矜舊物念臣本由誤選察臣頗厲樸忠特輟簡書式垂詔諭抑諫垣之讜論寢司敗之成科仰戴寵私交流媿汗餘生再造九殞莫疇然臣嘗豫近司粗知前禮既有干於公議即難廢於常刑當保邊捍寇之秋非屈法申恩之際而况軍行三載日費萬金既未能逐敵踰沙又不克全師守律偶麾手

策畧挫羣亮過有若斯理宜無赦矧復士心未振兵勢尚分逆黨益驕謀將全乏臣五能已竭十駕方疲將何善後之機更總防秋之算實憂誤國非敢顧身願頌黜罷之文免累安危之計又慮朝廷以臣職當引咎意在辭難則街亭喪師孔明削其丞相西陵縱敵羊祜降為平南望舉舊章以懲不武侯成來效漸異功除

明堂乞朝覲陪祀表

臣某言伏以皇王宗祀邦國之大猷陪鬯致恭臣子之榮願敢殫就望之款仰祈照臨之私中謝伏念臣早以諸生寢承顯遇乏涓埃之微效冒文武之崇名逮事兩朝猥叨法從仰此緝熙之禮復遭親祀之期聆詔綍以馳誠悵藩垣而繫迹阻肩鷺序獲奉天儀伏望尊位皇帝陛下閔以衰遲矜其悞悞特頒開可之旨俾瞻稀濶之容甫訖侍祠即時還任

代謝生辰禮物表

臣某言伏蒙聖慈特差某官某押賜臣生日禮具謝上

表者鴻私俯逮蕃錫有加拜賜已還揣躬憎惕中謝伏念臣叨承寶胄仰托皇闈早列郡封靡階功緒顧以年方蒙稚性異溫文周寢問安徒謹鷄鳴之候虞庠就學未通背誦之規豈意宸衷曲記生日特令近職肅將朝恩鈿器織文榮頒於御府兼衣駮駟寵集於藩房載省無能曷勝慈獎此蓋伏遇尊位皇帝陛下欽延真蔭允迪天門迺眷本枝務隆恩典九霄流慶雖無報德之階億載承顏但罄因心之禮周章感懼倍萬常鈞

代辭謝兼中書令表

臣某言伏奉制命特授臣某官者上儀交舉方畢於嚴禋純錫誕均遽叨於茂渥省循所至震慄交深伏念臣性異生知識慙幼悟但以早承慈獎昭啟郡封已視秩於三階復兼勞於八舍加以七經初授方勵於愚衷百行未彰動煩於聖訓豈謂此者國家奉天尊祖祇薦鴻名類常禋宗聿成大報祺祥方茂恩獎誤加進左相之崇資廣爰田之食賦唯仰延於真蔭實俯媿於無功伏

望尊位皇帝陛下察以由衆軫其非據特頒朝旨追寢命書是則國體至公靡厚家人之愛材臣知勸免騰鄉校之言懇激周章期於得請

代謝蕙中書令表

臣某言伏奉制命特授臣蕙中書令加食邑一千戶食寔封六百戶者精真降祐茂集於上儀蒙幼何功首均於大慶懇章繼上溫詔靡俞仍俾斷於來封難重煩於睿聽拜受祇竦榮懼交深中謝臣聞昔者順天以制官信賞以懋德所以西臺之重觀象於紫微右相之尊比崇於黃閣在於加邑亦用疇庸自非聞望素高親賢莫貳舍中履潔積行累功則何以登翊大猷出納明命仰惟亨會彌慎隆名如臣者性本顛蒙才非秀峙壽街著辯魯未顯於天資甲觀分榮徒早承於聖蔭由是升華近衛列爵上公爰建節於近藩遂䟽封於吉壤量能既淺昧進尤多而况年甫勝衣禮方就學忠孝維寶初佩於格言經籍是娛未通於奧旨比者伏遇國家講求鉅

典涓選靈辰鏤溫王之祕文薦清都之丕號祇見祔室
拜貺陽郊既舍爵以策勲遽出綸而錫命俾冠八貂之
列仍加五等之封真食兼增寵章尤茂竊自惟度深積
覲慙繼伏奏於公車願追還於恩制嘉言都穆游形敦
諭之私渥澤頻繁莫寢已行之命黽勉祇荷啟處無從
此蓋尊位皇帝陛下茂擁天祺博延道蔭寵帝光之寶
緒豐膝下之深仁是推不次之恩用表曲成之造敢不
勵誠夙夜遜志詩書鳴玉內朝永奉問安之禮承顏幄
坐更勤侍膳之心庶漸稱於慈衷用仰醅於宸造感抃
之至倍萬常鈞

上謝恩物引表

臣某言伏奉制命特授某官者恩典有加拜受祇慄伏
念臣仰承國慶幸托天枝爰在幼齡夙塵隆寵今者猥
蒙朝命特啟郡封進秩近司肇頒於美號兼榮右相仍
廣於爰田退省何功實繫鴻蔭此蓋尊位皇帝陛下高
明垂裕右饗延恩允章宣哲之靈丕顯在天之德務克

昌於聖緒用誕降於多祥是致童蒙昧茲優渥唯當率
遵方穀恭載宸慈詒厥之謀敢忘於對越聿懷之福更
賴於寵綏祇報之儀具陳別奏周章懇激倍萬常均

代賀水清木連理表

妾言今月某日伏觀後苑奏有兩處水清木各連理者
鳴鸞展采瑞木聯芳仰觀孕禧俯增大慶妾中謝竊以
象輿載育表異於天資平露惟喬效祥於國政蓋德風
之醇暢致神物之蕃淵况在平柯尤章美應伏惟尊位
皇帝陛下紹宣鴻烈懋建遠圖天人之際已交禁園之
之芳挺異雲枝內附茂昭混一之符華晷載陽式協中
和之德煥珍圖而有耀宣景鑠以無疆妾限守宮闈莫
陪警蹕仰明休之允穆增率舞以攸深

接駕謝撫問表

妾言今日至伏蒙聖慈特賜傳宣撫問者星軺爰降
絲旨旋頒仰戴鴻慈俯增丹懇伏念妾獲塵中壺幸會
昌期屬法駕之省方已回鑾而復路爰趨近甸恭候先

驅遽承郁穆之言俯諭眷懷之意荷恩榮而有耀疇覆育以無階

第二表

妾言星使俯臨絲言載諭祇膺睿造俯積丹誠伏念某幸托宸闈仰逢亨會屬真區之巡祀詔法御以言旋爰詣近畿恭迎制蹕遽被出綸之旨俯推乃眷之恩荷慈渥以何勝顧兢惶而靡措

謝進奉回詔表

妾言伏蒙聖慈以妾所進特賜詔諭者皇明通燭帝綽垂文祇捧已還兢榮失措伏惟尊位皇帝陛下寅威瑞命顧謏靈謀言瞻景毫之區式效襄城之駕齋心靖館方菲食以矜莊荐鬯駕壇將迎真而展寗妾限居椒掖莫奉玉盞虔修貢獻之儀仰瀆鴻明之德遽奉發中之詔茂宣逮下之慈顧曷稱於褒優但俯增於戰越

楚王謝恩表

臣某言伏奉制恩特授臣天策上將軍行興元牧賜劍

履上殿書詔不名依前守太師尚書令依舊在宅養疾
餘如故者恩制誕宣徽章載峻仰戴加崇之典俯懷非
據之慙臣聞隆器大名必先於有德殊榮異數豈及於
無功如臣者託體宗枝承暉寶萼之間平之令譽異周
召之元勳位冠中臺任隆西省總鉤陳之近衛分列軫
之輿區禮徒厚於朕膳效罔階於塵霧唯賴寵私大庇
友愛曲成宴處安安俾階於養素夙興翼翼莫展於在
公常自省循尤為冒昧豈謂伏遇尊號皇帝陛下德綏
九族惠育羣黎誼常切於展親化方深於教睦繼先猷
之久大丕顯於孝思紹真緒之延鴻務均於道蔭式稽
良日爰賜命書備褒寵之殊猷極優隆之貴範葭莩至
薄荷敷叙以何勝麟趾實繁顧徽榮而特異未遂內朝
之禮但銜右戚之仁感抃兢榮倍萬倫等

欽定四庫全書

文莊集卷十

宋 夏竦 撰

表

代王文正相公辭司空第一表

真館告成方臻於吉日慶霄垂渥首及於具臣慙震所
深周章失次臣某中謝竊以宏父之職邦土是司任惟
其人固難求備坐而論道是謂無官自非宣清重之風
茂冲粹之德將何以會通九澤監總百工備四近之班

應三階之曜如臣者材質庸菲性識顛蒙禁省代言微
深厚之體近司閫政乏康濟之謀徒以叨逢聖明過賜
丹采巖廟廟充位華貂有不足之譏武帳承顏前箸無可
籌之事至若眷徽五典懷柔四夷率育黎蒸簡清流品
封崇於恒岱奠瘞於河汾緘祕刻以朝元展欽柴而拜
祝宣明禮樂之制布昭巡靖之儀惟仰奉於成謨莫少
陳於末議洎載均諸賞典常首冒於徽章維石巖巖莫
允具瞻之望伐檀坎坎但增素食之譏昨者國家祇若
靈猷欽崇祕宇觀紫微之法象侔曲密之威神官有居
方蓋動遵於精意事無愆素則自屬於攸司而臣上領
使名本無職局未嘗面勢親總工庸惟奏格於馨香自
肅祇於齋潔豈謂慶成之日首叨非次之恩俾正位於
公槐極加崇於鼎席况冬卿之望古制攸難本非虛受
之資豈是徼榮之地重念臣聲猷寢昧齒髮甚衰師長
朝猷歲時滋久忝居揆務命數非輕尸厚祿以尤多妨
賢路而斯甚早欲露章車府延首帝閣願避寵私用全

散拙屬敦仁之俯逮寔布款之未遑豈可更竊茂恩荐居隆罷縱人言之靡畏抑自訟以何安苟昧進以無厭必惡盈而有咎循牆偃倮跼地怔忡伏望陛下深惻上仁俯矜丹懇特寢出綸之命俾寬據疾之憂如此則求賢審官靡替及功之賞陳力就列式敷知止之風誓更竭於涓誠用仰酬於大庇兢惶隕越得請是期

辭司空第二表

國恩非據天聽蓋高既未賜於允俞但俯增於惴慄臣某中謝竊以三公之任庶政是維燮順天和登翊王度所以無人則闕有德乃堪况惟度地之資尤重經邦之寄舜咨伯禹始別九州之封魯任宣尼爰分五土之物逮茲以降厥制彌艱或寵重於茂勲或旌明於懿行未有不階人望誤被朝章儻成虛授之私寔損至公之道如臣者素無微效幸遇昌期陟降凝嚴周旋機近熙帝之載既乏於訄謨為儒之榮又踰於素望不能早避賢路博衍時材荷大庇以雖深顧傷庶之已甚豈可不能

早避更竊微榮况琳宮揆日之初梓匠飭材之際上則蒙成於聖慮次則專達於攸司臣有何功豫茲懋賞苟廟堂之位可以假人則軒冕之恩不足勸下將何以表儀羣后弼予一人

代寇相公謝恩表

臣某言今日伏蒙聖慈賜臣官誥一通勅牒一道特授臣前件官者睿造曲成寵章有異載循淺拙不任兢惶伏念臣本以庸材叨逢慶會詎諧人望誤簡帝心自忝昧於慈榮實頻繁於要近既靡揚於吏職固遑卹於人言豈謂伏蒙尊位皇帝陛下俯念顛愚曲推恩庇授之節制斷自宸衷矧視秩於公槐抑兼營於台鼎雖竭心而有素寔報德以無階唯更誓於夙宵冀少酬於臨照

又謝恩表

臣某言奉符仁里式罄於精衆徹饌真場爰及於大慶播鴻徽之允穆介蕃祉之無疆降及萌生率同抃蹈中

謝竊以混元無象判渙於二儀冲用自然周流於萬化
洪惟教父肇啟真源強分太上之名茂洽有常之德唯
降臨之勝地有祈福之嚴祠漢崇文石之壇靡昭於儉
素唐制金蓮之舞詎極於誠明允屬昌辰式揚茂典恭
惟尊位皇帝陛下睿明攸縱恭儉式孚祖武宗文昭宣
於馨烈尊道貴德懋建於大猷受綠字之元符集紫清
之景祐勒封云岱則瑞氣成宮展案河汾而祥光燭地
遽感通於宵寤爰降格於仙游昭長發之鴻源諭聿懷
之密命上仁愈洽盛事彌敷乃眷靈區俯俞勤請命攸
司而經始酌洪典以時中神物嘉生溢珍圖而繼至殊
庭大室陳告禮而啟行羣后奉儀寶文先道積明誠於
京闕宣睿作於洞章爰協震辰首登徽冊百司定列肅
陳薦鬯之儀九奏成文亟備升禋之禮凝蹕於省方之
館受釐於頌瑞之庭萬寓駭奔百靈交慶英聲無已騰
懿鑠於九圍道陰彌隆庇羣生於億載叨分留事幸奉
嚴禋仰丁襲吉之辰共積逢時之幸欣榮抃蹈倍百常

鈞

代寇相公辭官表

雲雷之澤曲播於慶霄旌榮之榮誤加於瑣質揣循斯
至祇受誠難臣某誠榮誠感頓首頓首伏念臣本以諸
生誤階榮次荷先朝之振擢參近職以頻繁罔知退食
之規徒益在梁之刺洎偶繼明之際過聽圖任之私召
自藩垣俾釐京室方總貨泉之職遽叨鈞鼎之榮爰外
布於節條亟入司於留籥逢辰之幸曠世難名其如家
世素微年華漸暮雖竭當官之節終無報國之階况會
府分曹已漸於八座陪京出守止望於一麾過蒙帝造
之曲成叨踐樞庭而承乏奉行成算循舉舊章絕無廣
盛之謨但積祇膺之懼豈謂伏遇皇帝陛下矜其不逮
恕以無他特垂踰望之恩用示簡心之澤聞命之始跼
地無從况文武聯榮人臣極致惟聖朝之三葉符茂典
者二人趙溥以佐命元勳方兼於將相李至以攀龍舊
德止擁於旌旄臣也何功妄階茲寵縱造化獨私於淺

拙而鬼神必害於滿盈仰承保庇之仁但銘於骨髓退
思止足之戒實悸於肺懷伏望聖慈俯矜丹懇復七兵
之舊列寢六纛之殊恩儻得束帶金閨紆紳丹陛再拂
桑榆之景重親日月之光更厲夙宵虔服資忠之訓庶
俾塵霧仰酬任舊之仁

代寇相公謝詔允百官國學觀先皇御書表

臣某言睿辭從欲溫詔曰俞祇誦已還兢榮交集中謝
伏惟尊位皇帝陛下寶慈宣化克已敦仁翼翼因心茂
著聿追之孝孜孜典學誕隆載郁之文式眷虞庠肇營
軒閣闕先朝之睿迹緘以金滕昭善繼之聖謨垂之玉
刻俾多方之仰視彰累盛之流徽臣等謬籍金閨未趨
璧水爰祇章而列奏願澡雪以榮觀遽承出綍之言特
允叩門之請交趨動色覩能事而有期誓節盟心報鴻
私而無地兢惶感忭倍萬常鈞

代寇相公謝賜還京哥表

臣某言福壤還銜式臻於中禁薰風流韻爰播於永言

叨仰止以為榮顧乃賡而增愧中謝伏惟尊位皇帝陛下寬仁逮下寅畏時中顧謐明威紹揚先烈自欽承於道誨彌昭事於真源奉綠錯之符虔趨於仁里奏紫極之舞順拜於清壇膺介祉而有融霈鴻慈而允洽亟回輿於近甸既飲至於太宮陽位欽柴將修於大報睿文章漢遽發於英聲被六樂以和同鑠三辰而均麗暢聿懷之景命昭有翼之精衷臣幸邁昌期獲頌聖藻藏家傳寶顧圭竇以增輝稽首颺言撫么絃而積媿仰塵聽覽伏切兢惶

謝宣示綿州進彰明縣崇仙觀栢木文彩像道士七星儀形表

臣某言今月十日宗政殿伏蒙聖慈宣示綿州所進彰明縣崇仙觀栢木柱上有文彩像道士形儀分明可高七尺兼北斗一座者美材薦祉靈像成文祇覲以還慶祭交至中謝伏惟尊位皇帝陛下紹隆先志懋建民中罄寅畏以禮神保惠和而育物皇圖候日丕顯於鴻猷

真祖在天誕彰於道蔭播三儀之善氣騰萬物之嘉祥
矧彼左繇素嚴祕宇惟丹楹之有覺挺堅栢以含章久
佇昌辰適彰瑞理上儼靈仙之體旁分斗極之形審諦
無差周旋悉備清衆載考協開元至盛之符羣后仰瞻
實治世無疆之應臣等濫塵樞近獲邁珍祺抃蹈之誠
倍萬倫品

代寇相公進和御製升祔詩表

臣某言伏以清廟肅雍既嚴於尊祔薰弦和雅遽播於
聲詩叨拜賜以知榮預颺言而匪稱載循浚昧伏積震
惶中謝竊以周美太任聿著思齊之頌魯尊先妣爰歌
有血之章蓋昭布於信辭用形容於盛德伏惟尊位皇
帝陛下寅威景命嗣服慶基誕彰錫類之仁務極顯親
之禮近以欽崇先后稽考舊章恭升帝母之尊祇侑神
宗之室揆休成而允協薦禋潔以惟馨虔敷章漢之文
茂述因心之道克諧以孝昭虞舜之大猷煥乎有文宣
陶唐之懿德臣幸鍾運會素乏藝文載賡郁穆之音彌

顯滔堙之累仰塵聽覽伏切兢慙

代丁相公賀元德皇后祔廟禮畢表

臣某言鴻儀茂舉至孝允孚凡在照臨咸同慶抃中謝
臣聞魯尊先妣姜嫄始立於闕宮唐重母儀昭后終遷
於太室徽音匪遠彛制具存恭以元德皇后作合先朝
誕生上聖自別宗於廟享庸未極於禮章伏惟尊位皇
帝陛下錫類推仁追恩著德體周文之翼翼極虞舜之
烝烝仰惟帝母之尊虔納輔臣之議用欽崇於尊謚恭
升配於神宗涓選靈辰宣臻熙事百官承式奉徽冊以
惟寅萬世不祧致明禋而永穆丕顯奉先之禮茂昭維
則之恩先置真祠仰聞大慶趨闕庭而靡及增蹈頌以
攸深

辭官第一表

臣某言真馭下臨式均於大賚寵光遐被首及於具臣
退省何功實為非據臣某竊以漢宗特進實寵於勲賢
魏重右曹用司於樞要典章所載名器甚隆允屬昌辰

尤為大任苟之當仁之譽必貽虛授之譏如臣者望實非優藝文素淺當先朝之政治誤膺東掖之私遇上聖之繼明曲荷眷懷之造周旋宥密叅預彌綸唯仰稟於睿謨莫少裨於帝載爰保釐於洛邑洵居守於神臯曾微扈從之勤再奉疇咨之命鴻鈞播物但繫天地之仁神鼎調元莫適鹽梅之用昧進固踰於涯分省躬每懼於顛躋此者伏遇皇帝陛下奉若景靈祇明妙化感上真之報降昭帝緒之綿長茂對皇穹既嚴於禋饗誕敷慶渥亟及於近司進二品之崇階正三臺之峻秩乃加并賦并示寵章雖堂陛惟隆務推於優裕顧斗筭至小必致於滿盈須傾若厲之誠仰黷蓋高之聽伏望陛下俯矜短拙曲示保全濬發宸慈俾收成命如此則公朝之典克叶於無私鄉校之言免譏於不稱仰干旒宸得請為期

第二表

臣某言寵私非據誠請未俞載自省循彌增隕越臣某

竊以受爵不讓賢德之深譏無德而貪典章之明戒矧
躍池峻秩執璧崇階實真相之華資固公槐之異數自
非勲勳曷副疇咨如臣者素乏藝能誤膺眷倚裁成庶
政但傾將事之誠弼亮大猷莫著彌論之議唯以幸逢
期運頻歷歲年仰膺圖任之私不責謨明之効素殫多
媿難逃冒忝之譏榮路久妨每積滿盈之懼此者伏遇
皇帝陛下齋心體道恭己節神居蠖護以儲精宅希微
而觀妙荐膺祕錄交舉鴻儀遠至邇安惠和胥洽天明
地察報降日彰感真馭之俯臨諭仙源之邃遠克昌厥
後茂奉於景靈永錫無疆誕膺於純嘏式均異寵首被
台司右曹之任尤崇特進之名至重益爰田之公賦皆
推德之徽章聞命益驚循牆失措遽傾懇悃固避恩榮
而睿聽蓋高未收於渙汗危誠益厲彌積於怔忡苟昧
進而自安必曠官而罹咎况屢干於聽覽期特賜於允
俞伏望陛下深惻上仁曲回久照追寢出綸之命俾寬
跼地之憂如此則求賢審官式叶無私之化陳力就列

免增有覲之慚干犯宸嚴期於得請

代樞密相公辭官第一表

臣某言真祖肇臨茂昭於純錫寵靈爰被首及於近司
退省踰涯罔知攸措臣某竊以漢宗掌武之秩實典於
樞衡唐設褒功之名用優於勲績矧圭田之厚賦皆懋
德之徽章允屬昌辰尤為異數功庸夙著聞望素高式
副僉同仰膺眷倚如臣者藝文淺陋胄緒單平始登射
鵠之科止竊代耕之祿振纓幕府結綬蘭臺夙宵靡造
於官箴尸素遽通於閭籍爰遇繼明之運首膺下濟之
仁踐清切之要司歷凝嚴之近省發揮帝誥莫暢於鴻
猷參貳台衡蔑聞於善政固民瞻之匪邈惟聖造之曲
全載塵侍從之資遽總樞機之務屬元符申錫茂禮交
修奉先置以何功贊上儀而非允暨荐敷於大慶皆有
竊於殊恩憂愧彌深寵光繼及遽升榮於鼎席復正職
於樞庭責寔循名固昧和羹之望致遠任重方深顛躋
之憂此者伏遇皇帝陛下惠迪先猷寅威神化自欽承

於寶籙彌尊奉於景靈守慈儉而化人宅中庸而體道
皇穹是輔密命有開始宵寤以符通逮真游而報降簡
冊虔尊於徽謚羽髦祇告於太宮欽修茂對之儀用極
齊民之意就陽升燎誕受於繁禧逮下均惠首覃於瑣
質進台極三公之位兼加懿號之榮益井田五等之封
仍增真食之數寵私繁縟進退周章無德而貪詩人之
刺斯見知止不殆道家之戒甚明苟昧進而自安必曠
官而負恥上累知臣之鑒下貽覆鍊之虞須瀝丹誠仰
煩宸聽伏望陛下曲回久照深惻上仁俯矜益厲之誠
追寢已行之命如此則公朝賞典克叶於程材鄉校多
言罷譏於竊位上干旒宸得請是期

代東樞相公辭加恩第二表

寵靈非據誠請未俞循省已還周章失次中謝竊以知
止不殆道家之戒甚明以榮為憂先哲之規可覽伏况
臣自叨慎簡尤乏訏謨待罪樞庭莫裁成於大政兼榮
宰府已臻極於隆名屢省妨賢常虞瞰室此者伏遇皇

帝陛下欽承道誨祇通靈心效駕真區薦明馨而有翼
奉符泰時嚴陟配以惟寅臣叨贊鴻儀靡詳盛節屬均
恩之云始膺懋賞以負殊進公府之崇階廣爰田之厚
賦聞命而震惶靡措循涯而盈滿是虞爰瀝肺肝仰聞
旒纁若厲之誠徒切蓋高之聽未迴須再黷於凝嚴期
稍安於隕越伏望陛下俯矜短拙過示保全特推從欲
之仁俾寢已行之制是則多言可畏免騰虛受之譏信
賞無私允叶至公之道戰兢懇到得請是期

謝加恩表

臣某言泰時欽柴式推於茂渥公車奏牘爰錫於徽章
遽荷宸慈俯頒優詔既靡俞於懇悃難再瀆於凝嚴祇
荷寵私伏增榮感中謝伏念臣文非近雅材不逮人幸
會鴻名謬階通顯紫宸揮翰莫宣暢於大猷會府寵材
止奉行於舊典而屬皇穹降鑒景命肇新昭事景靈叨
榮於恭館交修盛節獲侍於寶文顧庸昧之無能辱眷
懷之特異振纓東掖始鈞夜拜之榮結綬中臺忽貳春

官之職洎真游降格睿志寅威貢九牧之良金範三清
之晬象導迎將命方體於精乘振拔踰涯俄參於庶政
顧乃版圖之秩愈增淵谷之憂昨者景亳朝元園壇報
本叨戒先於備物既肅奉於明禋曠怠是虞啟居增惕
豈謂上仁攸惻賞典斯隆賜八柱之貴勲進三品之崇
級上公列爵仍加凌閣之名真戶益封兼廣爰田之賦
念非才之最甚於瀝懇以尤深顧渙汗之難收但怔忡
而祇受陳力就列益媿於滿盈以榮為憂彌增於隕越
此蓋皇帝陛下責非求備道在包荒觀堂陛之言用優
於近列播乾坤之德務洽於純禧唯當退自揣循進思
刻勵詠伐檀之什已媿於無功歌天保之章敢忘於報
上誓傾勤拙少荅照臨

代東樞相公謝授官表

臣某言飈歛降真式均於大慶絲綸示寵併集於微軀
爰揣分以增憂繼削章而瀝懇荐荷聖明之詔靡俞遜
避之誠難屢瀆於惟聰但俯增於有覲僮俛祇受以榮

為憂臣竊以秦官掌武之司式總王旅唐制懋功之號
實寵勲臣矧加地之徽章皆疇庸之茂典自非澡行浴
德履潔含忠績簡帝心聲敷物聽則何以仰膺眷待允
副僉同如臣者材實非竒行能無算寡庠序雍容之譽
乏丘園潔素之姿徒雕飾於庸頑誤陞攀於仕進當先
皇之求治在小善之咸收及攘臂辭場始奉命卿之薦
比有名路荐塵入幕之資固婉畫以無聞但食貧而自
守豈謂誤承陟詔擢典秘文亟臨閔市之司甚曠征屢
之職屬大明之繼照均茂渥以旁流遂通籍於朝闈仍
效官於會府體寬大之詔敢議於煩苛陳蠲復之科過
叨於獎與始預七人之列俄居四近之榮丹筆詳刑固
平反而寡要紫宸撫翰寔潤色以無聞但自結於聖心
旋陞榮於內禁金鑾夜召恭奉於威顏玉壘晨征遽銜
於睿旨既撫安於瘵俗式宣暢於仁恩忽膺乘驛之趨
俾貳秉鈞之烈巖廓建議莫裨贊於大猷邊圉折衝詎
澄清於遠畧無勞被遇自訟增慚既騰不稱之譏益賴

曲全之德遷內殿優游之職冠近臣侍從之班寢食圖書方思於肄習總釐樞軸忽荷於倚毗屬三邊徹警之時是萬國同文之日循舊章而進秩無所建明繫睿算以蒙成但知將順屬元符之申錫惟密命之有開克昭右席之靈將展合祛之禮亟司先置於備物以何功首奉殊恩在策勳而加等矧梁陰之降禪報厚地以增基猥奉睿慈曲揚茂實莫極形容之妙荐叨優渥之私暨巡祭於魏睢復欽修於漢祀贊鴻儀而非允錫異數以彌隆載惟班瑞之壇謬奉肆朝之禮復承優假曲被寵光雖盛節紛綸務洽龐鴻之慶而寵靈繁縟益增冒忝之憂方多愧於非材復誤膺於爰立樞廷正職詎宣宥密之謀帝傅叨榮徒玷論思之任雖宸衷之靡替在輿誦以彌喧維石巖巖莫允具瞻之望伐檀坎坎但增尸祿之譏昧進居多食浮滋以此者伏遇皇帝陛下祇明至化恢大慶基宏亮嘉謨翕純而克裕紹休先烈烏爽以垂鴻寶慈儉以化人宅粹和而觀妙無思不服誕宣

清淨之風有感遂通昭合希微之道酌中庸而立德守
淵默以儲精馨烈升聞皇穹降鑒感仙游之昭假彰聖
緒之攸長誕膺永錫之祥丕顯克昌之祐祇嚴簡冊既
薦於尊稱焜燿樵蒸爰修於盛典式覃榮渥首及具臣
進秩三階錫美名而益茂增封五等加公賦以尤豐載
自循涯豈遑聞命况振景拔迹在超越以難階苟損寔
虧名必滿盈而易覆顧不能而將止况自見之甚明遂
稽周任之言亟效范丹之節雖怔忡失措繼傾若厲之
心而渙汗難收莫寢已行之詔但周章而祇荷固隕越
以無從此蓋陛下欽奉景靈誕均純錫特掩妨賢之咎
益推注意之仁敢不刻鏤肺懷揣摩鈇鈍竭心官次庶
逃竊位之虞勵節朝端免負知臣之鑒少輸勤拙上荅
照臨

代東樞謝賜宴并御詩表

臣某言泰時慶成方均於渙渥薰絃濬發爰播於聲詩
叨拜賜以知榮顧颺言而靡稱中謝伏惟皇帝陛下順

承天則懋建民中包舉藝文化成於綿寓肅恭祭祀誕受於蕃禧近者祇祓齋輿朝修真館奉蘿圖而展宋歲金刻以著誠爰飲至於帝居遽涓辰於郊報園壇備物奉二后以侑神紫幄受釐眷萬區而均祐仰體需雲之象俯推湛露之恩玉笋芳醪合多方之允穆栢梁高韻宣介祉之無疆函四始以飛英協六同而振律緝熙王度煥衍帝謨臣等謬備樞機親逢旦暮章天睿藻幸傳寶於私門堙耳庸音媿賡歌於聖域共循蕪累預積兢慙

代東樞相公謝生辰禮衣器幣鞍馬表

臣某言寵私俯被榮錫有加拜賜已還揣躬增惕中謝伏念臣聲猷素淺器識非長幸會亨嘉遇承甄獎奉樞機之密命叅鼎鼐之崇名循舉舊章莫建將明之議蒙成睿算但增忝昧之憂豈謂宸衷俯記生日特令賤息肅將朝恩駿駮兼衣榮臻於瑣質織文鈿器慶集於私門載念無能尤增內訟茲蓋伏遇尊位皇帝陛下法天

垂覆體道延慈式眷近司務推優渥功微賞厚固無可報之階恩重命輕唯勵自公之節兢惶感懼倍百常鈞

謝賜地宅表

臣某言皇慈振惠夏屋定居仰戴恩私伏增隕越中謝竊以齊招賢士宅於康莊之衢漢寵列侯賜之甲乙之第蓋國家之茂典寔臣子之殊榮伏念臣世緒卑平藝能淺拙豈謂聖明過聽簡拔踰涯待罪樞庭俾虛於官謗兼榮鼎席莫允於民瞻頃者初玷朝闈肇營私第前瞻太室密邇闕宮常戒前驅靡容呵止然尚憂於囂雜或有黷於靖淵加以寒族漸多聚居頗窄屬蕙河而環水洎倚城而建門仰昭事之載嚴彌退思而增惕將懇求於更次遂載浼於凝旒曲成造化之仁俯遂萌生之欲特頒爽塏仍俾修營自顧何功重勞庶役矧屢煩於睿旨命催督於攸司曾未踰年於茲成室率六親而樂止展四體以安居面大道以甚崇近北闕而知寵邊陲無事雖慚去疾之辭退避未遑猥奉五倫之賜敢不夙

宵誓志啟處懷恩永輸蝼蟻之誠上報乾坤之施

欽定四庫全書

文莊集卷十一

宋 夏竦 撰

表

代宰相謝加食邑表

臣某言褒司進秩寔駭於與情車府露章莫回於成命
拜受祗踈凌兢失圖中謝竊以昔建地官寔司邦教商
周之際或在於元卿漢魏以還顓居於三事倡尊^九牧
安協兆人古之多材尚不求備况臣人品庸菲世緒卑

平不意逢辰遂踰始望禁林贊畫微深厚之訓辭樞府
備員之懷柔之上畧而自叅承四近師長百工贊相盛
儀布宣能事奉行睿旨既昧於將明循舉舊^章抑多於忘
誤雖曲成於大庇終莫允於羣瞻乃者祇奉絲言總司
金匱約編年之舊體頌先聖之鴻徽廣記備言並資於
羣士兼條總貫皆稟於孝思臣有何功成茲大法豈謂
誤膺賞典遽忝從臣載益爰田仍加真食外廷誕告有
位震驚誠以名器隆高非假人之物年華^暮豈昧進
之時縱靡卹於羣言亦何安於心曲繇是懇陳奏牘願
寢異恩渙汗難收懼重煩於睿聽凌兢載省寔交悸於
營魂此蓋伏遇尊位皇帝陛下尊寵時文褒優近列對
越祖宗之德鋪觀堂陛之言是敦圖任之仁靡責當官
之效地崇禮絕既有覲以徼榮恩重命輕愈無階而報
國但誓桑榆之景仰酬天地之私

代僕射相公謝宣賜藥表

臣某言伏蒙聖慈賜臣抱龍丸解毒丸厭熱解躁金露

九蘇合大九白散子共一合者星使俄臨天言誕布靈
藥爰頒於三品微軀曷戴於鴻慈捧受兢榮罔知裁處
竊以元霜絳雪紀漢武之幽經五色一九著魏文之嘉
謀匪仙風特秀冲氣惟和則何以分金竈之力主減青
囊之銖兩如臣者性性至情知不及中飲水雖欲於自
清負薪素惟於多病萬幾之務祇稟於睿明四體之勤
寔慙於疏緩伏惟尊位皇帝陛下淵通妙用啟迪休祥
推神農嘗藥之仁布武王蔭樾之惠曲回久照優寵近
司屬茲清暑之餘慮鮮攝生之術九籥之丹甚秘太一
之散惟神載加亭育之私併示便蕃之錫玉音是諭温
純深厚以何勝寶劑初開郁烈光輝而盡在師聖人之
修煉辨太醫之苦良珠顆累累配合歡而蠲忿玉塵皎
皎泛華液以安邪豈唯去瘵以滌煩將俾輕身而難老
臣以謬承任遇殊乏彌綸荷予貺之斯來寔亨嘉之攸
會策疲駑而自勵顧涓勺以何施慎守靖恭敢忘報効

謝賜藥表

臣某言欽膺睿旨佇詣於真區祇荷鴻私特頌於妙藥
兢榮併集啟處不違中謝伏惟尊位皇帝陛下慈惠臨
人寅威順則受皇穹之命集帝者之上儀式眷魯邦寔
惟福壤紀始祖降靈之迹建黎元祈福之宮侔曲密之
威神方嚴於胥宇致中宸之精意將達於惟馨臣猥奉
疇咨俾承禋薦寔退憂於庸拙莫上體於齊明爰從受
命之初以及治裝之際過承臨照晝燭幽微顧優假之
踰涯方怔忡而靡措豈謂宸慈逮下寵賜存臨絳雪靈
腴極太醫之上品良金鈿器兼內府之奇珍載循臣子
之微生曷報君親之厚意唯誓增於勤瘁用仰副於欽
崇感懼周章倍萬常等

代僕射相公辭加恩第二表

寵私非據爰貢於露章宸聽蓋高未收於出綽揣躬內
訟跼地端憂中謝竊以漢肇儀司任隆於元老魏崇開
府寵茂於勲賢洎食采之增封並疇庸之異數自非協宣庶
績登翼遠圖厥有大勞靡符公議如臣者幸逢運會濫預

官常本無異衆之材止竊代耕之祿豈謂聖明過聽簡拔踰涯用師長於百工俾陶甄於至化蒙城帝力雖靡責於謨明違卹人言常動貽於官謗此者伏遇皇帝陛下寅威道誨包舉禮文曲里朝真詔百靈而奉蹕園壇報本尊二后以侑神泠大賚於中區峻寵章於近列願何功而受賞難昧進以徽榮况臣執秩崇階器名已重爰田厚賦封食尤多屢省無能方圖避位豈可更貪渥綍自速滿盈爰稽錫爵之願寢自天之命遽膺尺詔未允寸誠須繼瀆於惟聰冀稍寬於若厲伏望陛下曲成垂裕從欲推仁申飭攸司迨還恩制是則臣無虛受式敦止足之風賞不失勞永叶中庸之道周章懇到得請是期

宮使乞降御製御書表

臣某等言伏以西崑之府寔祕於帝文小有之天或藏於龍篆惟密都之肇啟而睿製之未頒敢俯罄於虔祈庶永諧於傳寶中謝伏惟皇帝陛下繹清心照濟發天

資典六樂以宣英總三才而觀奧爰自奉符梁趾瘞王
鄧丘按金輅以省方詣殊庭而尊道歷上儀而悉叙鋪
徃烈以咸觀煥衍蒼崖馨香翠琬以至誕敷瑞命挺紀
先謨著論辨之格言發慈悲之大願或冠篇於藝圃或
度曲於薰弦橫汾水以搞辭坐栢梁而傳唱青緗屢溢
藥簡常盈名以萬殊蓋百王之能事理惟一貫乃五教
之彞倫固已包舉國章發揮政本勉諭勤請嘗下濟於
私門敦勵時風已載刊於東序豈琳宮之久備而鳳蘊
之未藏式揆羣心尤為闕典伏望聖慈特賜御製御書
應曾出賜臣寮者各一本於玉清昭應宮集禧殿左右
嚴密收掌許道眾仰今後御製並乞降一本令本宮編
次是冀敷宣茂寔演暢真詮游鈞天者聞廣樂之音登
暘谷者識若木之采百靈潛衛佇集於颺輪太一下觀
將傳於月筆誓共諧於誠誦期永播於無疆

謝賜御製寵行詩表

臣某言真區將命方戒於修歧鴻藻寵行函頒於寶句

仍容賡載倍積兢惶中謝臣聞承元首之歌有虞所以
戒羣后賜威鳳之賦太宗所以獎勵臣寔曠世之殊榮
固逢辰之至幸恭惟尊位皇帝陛下通微作睿宣哲亶
聰懿文德以化人積精衷而順帝昨以僂游報降道誨
昭彰紀令節以維寅範辟儀而有穆爰考降靈之地是
當保魯之封仰體密都肇營恭館庶工締構方程礪密
之規上聖欽崇將達齊明之意臣獲膺朝旨恭薦令芳
咫尺威顧乍違於幄坐昭回烈采遽賚於雲章顯尊祖
之孝思繹多能之睿意薰風流韻承露均和仍推逮下
之慈曲軫遵塗之念漉丹誠而拜賜曷報於恩私竭累
氣以颺言尤增於戰越周章感激倍萬常鈞

中書乞免和御製遣懷詩表

臣某言宸章寡和繼漉於懇誠睿聽蓋高未頌於俞旨
載循淺拙彌積兢惶中謝竊以虞舜股肱之歌統盈數
句漢皇日月之唱止及七言故士師拜手而乃賡羣后
登臺而奉詔若乃聖辭玉振睿思淵冲溢鴻藻於縑緗

宣大猷於風雅蓋天資之有素固臣和之無階伏惟尊
位皇帝陛下盛德惟新多能攸縱奉先成裕儀孝奏於
皇穹典學宣精懿文明於聖域矧屬清閒之宴誕彰雅
正之音述帝迹之肇基叙真游之降統祖功宗德敷混
一之英聲帝錄皇圖迪重熙之景命至若合祛魯嶽巡
窵魏睢延颺駕於中宸薦令芳於曲里商立經邑昭紀
詒謀陽位欽柴祇嚴於陟配敷宣悉備包舉咸周陳王
業則七月之章告成功則清廟之什載行事則二帝之
典記禮容則三代之文理絕名言事超象繫爰私傳密
俾預賡颺臣等幸會亨嘉謬塵倚注覩流暉於雲漢已
極殊榮繼絕倡於陽春豈容輕議况惟頑陋並乏藝能
披縻而媿汗交流承命而營魂散越爰懇祈於矜免終
未賜於允俞若寶句非多稍知於睿式則蕪音是竭仰
副於清衷蓋以縟彩星繁嘉言天遠韻金相而累百畫
鈎婉而且千捧闕而涉海無津祇誦而崇朝未徧冠古
今而復出與造化以相伴六樂均和豈待么弦之嗣響

三辰宣麗顧容燭火之沉熒庶少息於周章用曲全於虫
鄙扣閣瀝懇得請是期

樞密院乞免和御製述懷詩表

寶思淵冲嘉言天遠仰聖謨之攸縱固臣和之無階聞
命已還周章失措伏惟皇帝陛下欽明順則濬哲宣英
考古道以建中觀人文而化下屬垂衣之無事惟典學
以游心式運寶跗裁成睿倡序開先之密命昭丕變之
鴻基二后在天播太寧之鴻烈三靈錫祉宣善繼之大
猷若乃雲岱勒封河汾展窠奉元真於祕殿陳嘉薦於
名區畫千里之畿紀興王之奧壤奏成之舞拜靈貺於
嘉壇經緯兼該廣大悉備布昭事實坦然堯舜之書丕
顯形容穆若商周之頌總百王之能事流億載之英聲
爰出示於樞司俾仰膺於帝製伏念臣等遭逢有素諷
賦非工雖久奉於文思終莫彩於頽陋况震雷之飛響固
衆籟之銷聲豈容燭火之輝更續太陽之耀敢期宸造
俯側非才曲示保全特垂矜免庶靡彰於虫鄙用少息

於兢惶誓堅盡瘁之誠仰答包荒之德

謝御製和詩表

臣某言飛霄寶甸方極於游揚埋耳庸音誤陳於歎詠
曲荷大明之德旁流下濟之輝祇誦兢榮罔知攸措中
謝伏惟尊位皇帝陛下九功成裕六學宣精祖武宗文
允隆於繼述尊道貴德務極於欽崇以是景貺有開元
符申錫丕顯齊明之志講求希濶之文蒼璧黃琮載揚
於聖統鸞輪藻衛遽接於僊游誕昭長發之祥茂降聿
懷之福精衷滋勵景命惟新寶縷凝釋肇開於節令玉
書先道將款於真祠載嚴昭事之規爰著頌宣之作運
寶跗而繹思披綠蘊以游心妙神化以為言協洞章而
成韻靈場夜誦初贊於純禧魄寶下觀亟彰於美應臣
幸齋恭館獲聽妙音穆王瑤水之歌意殊於祇畏武帝
交門之曲事異於朝修載惟淵妙之辭深貫希微之指
爰陳陋倡仰紀鴻徽顧燕累以為憂實兢慙而失次豈
謂有來斯應務洽於至仁無言不酬靡遺於庶物俯答

擊轅之響載流章漢之輝昔者繼元首之歌但見賡颺
之盛賜威鳳之賦本無屬和之榮夫何孱庸被此優渥
敢不誓心金石竭慮夙宵報聖明尤異之恩盡哀朽頑
駑之力忝忝戰越倍萬常鈞

謝表

欽承溫詔靡允丹情仍俾斷於來章難重煩於睿聽
詎祇戴周章失圖臣某誠榮誠感頓首頓首竊以節制
請侯實隆於閭寄平章庶務允正於台衡苟文武以兼
資乃人臣之極致自非功高命世德重端朝則何以仰
副帝俞俯諧民聽如臣者行非中矩學不傳經爰當筮
仕之辰止異代耕之祿不意妄階榮進誤踐亨衢兩朝
日月之暉繼叨於三接二府鈞樞之地並遂於再登莫
廣益於大猷徒宴安於高位載惟昧進常慮疾顛方避
寵之是圖冀變盈之可追豈謂遽膺綸綍特授旌旄乃兼
秩於禹司復增封於采邑省循所至震懾尤深敢將有
覲之顏更竊無功之賞爰再通於奏牘願必寢於徽章

何期渙汗之難收敢不怔忡而祇受此蓋尊位皇帝陛下仁惟宥物道在包荒簡自清衷俯推茂典蓋靡拘於常牒用特聳於崇觀命等鴻毛固無階而報德心同白水唯沒齒以銜恩感懼兢榮倍萬倫品

謝所撰內藏庫記刻於御製碑陰表

臣集言伏奉勅命以臣所撰內藏庫記刻於御製碑陰者奮睿藻於鸞龍特俞勤請勒庸音於金石曲示鴻私仰荷恩榮何勝隕越中謝伏念臣辭惟蕪累學不詳明幸際會於昌辰獲叨塵於美任昨以增修帑藏詔令撰述記銘遂搨朽以成文遽殺青而奏御恭以國之內府九貢所登必頒鎮以乾文千齡共承亟削章而陳請俄出綽而允從伏見神筆金相天才雲煥韻六同而合律懿五色以成章經緯古今發揮造化多士莫闕於聖域下臣敢望於清光豈期同尚采庸虛過重優假俾錄雕蟲之作仍刊翠琰之陰雖日月所臨燭火盡消於光耀奈英莖在上鄭聲愈覺於潛埋念藏拙以無從荷包荒

而有素更勵傾輸之節少酬樂育之私

代人生日謝恩表

臣某言君賜克臨私門增耀戴揣庸虛之質罔勝寵異之私拜捧已還兢皇失措中謝伏念臣時才素淺學術非長徒以際會鴻名叨承樞近巖廓充位但循奉於成規武帳承顏莫將明於大政寔素飡之滋久常內訟以居多豈謂尊位皇帝陛下道廣含容仁深亭育休堂陞務高之意極君親逮下之心每優假於恩輝庶保全於短拙洎臨生日曲記清衷命幼息於公朝奉皇恩於私地兼衣駿駮既極於殊榮嘉幣良金彌彰於異禮曳委非稱捧戴何勝負山而蚊力失疲向日而葵心自切敢不竭誠夙夜上効涓埃誓堅持節之心遙上捧觴之壽

代人進禮成宴詩表

臣某言伏以福時報終方頌於燕術寶附宣麗爰播於珍祺叨仰止以為榮顧乃廢而多媿伏惟尊位皇帝陛下清明有度聰哲維新祇奉綠文恭朝於真里欽陳蒼

璧茂對於景靈方襲吉於嚴宸遽示慈於折俎仍播栢
梁之高韻式昭宣室之蕃釐煥二帝之上儀總百王之
能事臣等幸陪鷄序獲賜雲章徒榮測管之闕敢繼鈞
天之韻但強抽於軋思用仰瀆於凝旒覲覩兢惶倍萬
倫等

代人謝弟端授官表

臣某言伏蒙聖慈特授臣弟端將仕郎守潁州萬壽縣
主簿者慶流霄極寵被天倫感懼所深心願靡措中謝
伏念臣藝能淺昧胄緒卑年幸會休期妄階榮進加以
朝無近戚世乏先疇老幼聚居盡資於廩祿甄陞非次
皆出於宸恩常自誓以丹情異少伸於芻蕘而夙宵一
志中外十年縱勵顯蒙絕無規益豈合近持私懇更瀆
惟聰蓋以臣弟端年已長成幼同艱苦先臣盡節顧遺
體之可矜母氏垂年寔鍾愛而斯甚是用仰援赦令遽
奏封章載揆僭踰尤深震慄豈謂狀蒙皇帝陛下曲垂
寬宥深惻上仁濬發德音亟延賞典持寵賜於微物用

俯激於忠規命等蜂蟻雖莫酬於恩重志懷霜雪誓共
率於官常庶傾塵霧之誠上報穹昊之施

代人陳乞為父修神道碑表

右臣輒憑懇誠仰千睿聽退循僭易俯積兢惶伏念先
臣贈某官某本以遭逢累塵事任蒙聖明之過聽膺命
數以斯隆大化俄臨昌辰難戀荷皇慈之惻下豐賻贈
以飾終顧荒隧之已封而溫珉之未勤將周施於事寔
必繁屬於時才其神道碑欲望聖慈特命某官修撰所
冀幽扃不昧俯旌遊岱之魂宰木增輝永示漏泉之澤
苟俯從於哀懇唯仰戴於宸私激切周章期於得請

笏記謝恩笏記

皇子新授具銜臣某言伏奉制命特授臣前件官者伏
念臣幸膺真緒獲奉皇慈大慶方成鴻恩曲被仰荷眷
懷之造永堅忠孝之心

欽定四庫全書

文莊集卷十二

宋 夏竦 撰

對策

崇政殿御試賢良方正能直言極諫科制策

皇帝若曰朕克謹承先訓惟懷永圖期化成於人文寔
順考於古道尚慮視聽不廣心志未明寤寐增勤忠規
是佇所以博延髦士庶獲嘉謨昔姬德之隆周官爰作
建中立極經世惠民乃致頌聲以措刑辟王風不競戰

國交興理貴從宜俗多變古炎漢政令十志粗存有唐
憲章六典備載既沿革而不一亮損益而可知曲禮三
千經禮三百雖難盡舉聊為敷陳施之於今徃古之事
何允揆之於古方今之法孰非當商榷其大猷無自執
於小道仲尼之志在乎春秋考舊史之文明將來之法
授經左氏發凡變例善惡必顯懲勸在茲由是後王遵
為彛訓至若朝聘祭祀之禮刑賞兵農之政君臣勵翼
之蹟官師亮寅之辭或可舉而行當直書其事唯菁莪
而是取顧糟粕而罔陳六籍之存日星是喻百氏之說
燭火攸同惡實尚華寔繁厥類斲雕為朴豈無其時欲
使薦紳之民並宗經術青衿之士專習聖言能黜異端
渴聞讜論貢舉之設茂異斯求爰自唐朝獨考辭賦雖
云小辨破道壯夫恥為然而定妍否於有司觀工拙於作
者苟或捨茲衡石誠慮夫之毫釐將俾俊乂用章文風
丕變其用何術以副虛懷禮有四民農居其一書有八
政食在其中務勸力耕亮由薄歛或輕其賦調即邦家

之用不充或重彼科役即編氓之力彌困至於權酷之法
閔市之征將以惠人亦思省去復慮經費不給游惰寢
多蓋欲蠲復民租不禁山澤而使野無曠土府有羨財
下靡趨於末利上益豐於儲蓄必有說也宜無隱焉宰
宰之任蒸黎所托在乎銓擇尤所注懷亦嘗閱考績於
明廷聽保任於端士暨於蒞職繼以敗官或邊幅罔修
簠簋靡潔或佩韋罕誠冠虎是侷雖國有常刑然民已
受弊今若峻其督責必興嘆於凝脂緩彼簡書將漏罪
而是取顧糟粕而罔陳六籍之存日星是喻百氏之說
爍火攸同惡實尚華寔繁厥類斷雕為朴豈無其時欲
使薦紳之民並宗經術青衿之士專習聖言能黜異端
渴聞讜論貢舉之設茂異斯求爰自唐朝獨考辭賦雖
云小辨破道壯夫恥為然而定妍否於有司觀工拙於作
者苟或捨茲衡石誠慮失之毫釐將俾俊又用章文風
丕變其用何術以副虛懷禮有四民農居其一書有人
政食在其中務勸力耕亮由薄歛或輕其賦調即邦家

之用不充或重彼科役即編氓之力彌困至於權酷之法
闕市之征將以惠人亦思省去後慮經費不給游惰寢
多蓋欲蠲復民租不禁山澤而使野無曠土府有羨財
下靡趨於末利上益豐於儲蓄必有說也宜無隱焉宰
字之任蒸黎所托在乎銓擇尤所注懷亦嘗閱考績於
明廷聽保任於端士暨於涖職繼以敗官或邊幅罔修
簠簋靡潔或佩韋罕誠冠虎是侔雖國有常刑然民已
受弊今若峻其督責必興嘆於凝脂緩彼簡書將漏罪
於踈網水火相濟琴瑟更張爾其謂何予實翹想緬惟
致治誠在待賢每恐下僚寔沉英彥或以類舉或自薦
陞負廉隅清白之名常從加守馳幹蠱端方之譽亦示
峻遷然而鮮覩徇公頗聞濫進始用朋黨終陷刑章言
念於茲夙夜無已欲使懷才者必達薦士者絕私奏牘
上陳美惡可復爵賞下降名寔罔違極言澄汰之方用
資宵旰之慮矧子大夫蘊蓄器業洞明政經副我詳延
森然就列靡悼後患咸罄昌言

對曰臣聞百王公共不易之道者惟諫而已矣古者致治之君莫不欲良臣在廷忠言日至揭進善之旌設敢諫之鼓太史陳詩以刺百工執技以諫暨漢孝文二年始下賢良之詔開納言不諱之路延直陳切諫之士訪天時之災異問朝政之闕失國家宅有神器五十年間上無逸德下無遺政而陛下尚慮視聽未廣心志未明高張六科躬訪時事誠臣以濟民利國之策干陛下之秋也臣生逢太平幼讀方策觀盛衰治亂之際未嘗不憤懣而握卷聞忠蹇鯁直之風未嘗不激厲而抗節今幸以區口之學應直言之名有司不以臣之不材升之於相府三公不以臣之不材進之於外廷陛下不以臣之不材問之於丹陛敢不扶膺膈之所慮盡耳目之所見謹昧死上對制策曰昔姬德之隆周官爰作建中立極經世惠民乃致頌聲以措刑辟王風不競戰國交興理貴從宜俗多變古炎漢政令十志具存有唐憲章六典備載既沿革而不一亮損益而可知臣聞周監二代文

物周詳姬旦踐阼憲章昭備詔六官以政令建五等以親賢禮行三雍法垂象魏故文武創業而臣工作頌成康致治而刑指不用洎平王東遷皇綱解紐黍離之什下列國風爾後九鼎漸輕七雄分競強吞弱吐干戈日尋合從連衡談說鋒起至有變衣裳以從俗峻法令以任權輕忠信而重要約壞井田而立阡陌官不擇行而擇言爵不尚賢而尚貴事叛於古敗亂相乘洎秦鹿野死漢龍天飛蕭何約尤章之法叔孫制綿蕝之禮律歷精密於盈虛郊祀周旋於壇時分郡國以王宗支制歌舞以象功德殊庸茂實際天接地故朝廷之制十志在焉洎三國分土禮樂無主垂數百載而唐有天命房杜議其律令馬周陳其法度致太平於貞觀制禮樂於開元分爵九等品有正從故職官之制六典備焉今陛下問其沿革詢其損益其將有所發於天下也臣願朝廷鑒歷代之所短舉唐漢之所長文者損之急者寬之過者抑之不至者進之則古今之美無不濟於下矣制策

曰曲禮三千經禮三百雖難備舉聊為敷陳施之於今
往古之事何允揆之於古方今之法孰非當商榷其大
猷無自執於小道臣聞先王本太一之道觀羔鴈之象
制威儀三千禮儀三百所以教天下之恭讓開萬民之匪
辟聊敷其要蓋有五焉記曰禮時為大順次之體次之
宜次之稱次之堯授舜舜授禹湯放桀武王伐紂時也
天地之祭宗廟之事父子之道君臣之義倫也社稷山
川之事鬼神之祭體也喪祭之用賓客之交義也羔豚
而祭百官皆足太牢而祭不必有餘稱也若窮禮樂之
沿革揆古今之得失則上世帝王不相沿襲功成作樂
治定制禮惟從宜而立法必師古而可久國家受天承
命造我區夏遠觀八世之典近取開元之制文物之盛
流芬簡策但太常工師或怠其習朝廷服章未明其列
珩璜之聲不聞豆籩之器罕用鑒往觀來其儀可見今
陛下當天啟之資有承平之業固當制禮樂易服已定
官名發號令建中於千古之上立極於百代之下則泥

金勒玉不足記其功德矣制策曰仲尼之志在乎春秋考舊史之文明將來之法授經在氏發凡變例善惡必顯懲勸在茲由是後王遵為彛訓至若朝聘祭祀之禮刑賞兵農之政君臣勵翼之躋官師寅亮之辭或可舉而行當直書其事唯菁莪而是取顧糟粕而罔陳臣聞周室將微諸侯叛命聖人有作至文爰啟發周公之凡例載魯史之行事筆削既至臣子皆懼故為列辟之彛章王道之準的漢代有命斯文盛行朝廷詔昔公卿章疏必引經傳為事規矩故歷祚攸遠法度可觀迨後中原多故編簡不完有國之君不遑逮此國家興起四方穆清治本建藏書之策立讐校之官陛下旰食視事乙夜觀書故下問小臣以大義抉六經之奧祕觀百王之明睿臣幼習史氏頗詳其學以為立明之傳繁富而誣臣請以經義條對如左臣聞朝以修制聘以結好時會以發四方之禁問問以諭諸侯之志表著以昭序玉帛以修贄考其道則在乎明班制而不僭整威儀而可觀動

必以禮不失其物臣謹按春秋書滕侯薛侯來朝者天子無事諸侯相朝書時者美其正也書荆人來聘者荆夷狄也書人者美其始能聘也書介葛盧來而不書朝者以夷狄不能行其禮也臣聞祭以追養祀以馭神聖人為能饗帝孝子為能饗親外則盡物而獻誠內則盡誠而獻禮備其馨香奉以珪璧然則祭不欲黷黷則不恭祀不欲煩煩則不敬謹按春秋書春正月己卯烝者譏其數也書夏五月丁丑烝譏不時也書猶三望者猶者可止之辭也譏其不知禮也臣聞刑賞者國家之二柄也馭其有罪則有刑贖廢奪語曰齊之以刑書曰金作贖刑周禮曰奪以馭其貧廢以馭其罪懋其有功則有爵祿車服周禮曰爵以馭其貴祿以馭其富書曰車服以庸蓋刑者所罰寡而所戒衆賞者所費小而所勸大故古者刑以秋冬象天之瘳物也賞以春夏象天之惠物也然則刑之大要在乎去姦軌姦軌不去則罰失矣罰失則濫濫則民不從矣臣謹按春秋桓公之世經

不書王者譏上之不能討其罪也賞之大要在正禮制
禮制不正則勸失矣勸失則僭僭則民不服矣臣謹按
春秋云王使榮叔來錫桓公命書來錫者譏賞不正也
臣聞古之兵制大夫有車百乘諸侯有車千乘天子有
車萬乘所以威四夷刑姦軌也必先教之以禮而後討
之以罪故先王之制甸服者祭侯服者祀賓服者享要
服者貢荒服者王有不祭則修意有不祀則修言有不
享則修文有不貢則修名有不王則修德序成而不至
則修刑於是乎兵有常矣後之王者奉之能行其禮能
守其正則得其道矣臣謹按春秋書甲午治兵者美其
得禮也書作丘甲者譏不正也臣聞古之農政夏后氏
五十而貢商人七十而助周人百畝而徹所以供宗廟
備車服必先限之以田而後取之以賦先王之制建步
立畝六尺為步步百為畝畝百為夫夫三為屋屋三為
井井方一里是為九夫八家共之一夫一婦受私田百
畝公田十畝輸虞衡之稅供車馬之賦於是乎農有常

矣後之王者奉之不妨其時不失其正則得其道矣臣
謹安春秋書新延廐者譏不時而悉農力也書初稅畝者
譏不正也至若君臣勵翼之蹟官師寅亮之辭考於左
氏之傳寔繁大夫之對然非聖人筆削請以經義言之
夫人君勵翼者在乎尊卑不黷上下不僭罪不妄誅刑
不妄加興滅國繼絕世春秋之義尊不親小事卑不專
大功謹按經有稱人以殺大夫者討有罪也稱國以殺
大夫者罪累上也經有書夏滅項而不言何國滅之者
為齊桓公諱也春秋為賢者諱桓公嘗有繼絕存亡之
功故君子為之諱也夫官師寅亮者在乎夙夜儆戒靖
恭其位賢愚有序貴賤有列安邦國利萬民春秋之義
用賢治不肖用貴治賤謹按經有書秋公子結媵陳人
之婦於鄆遂及齊侯宋公盟書遂者美其有遂事也春
秋之義大夫受命不受辭出境有可以安社稷利國家
者專之可也制策曰六籍之存日星是喻百氏之說燭
大攸同思寔尚華寔繁厥類斲雕為朴豈無其時欲使

薦紳之民並宗經術青衿之士專習聖言能黜異端渴
聞謹論臣聞經緯天地莫大乎六籍詩書標仁義之府
禮樂立教化之表春秋五始以載褒貶大易四象以觀
情偽從之則為正直為聖賢叛之則為姦亂為聾闇萬
代而下宗為格言然而去聖逾遠諸子鋒起各因文而
述志或希聖而扶經至漢孝成帝時已八十餘家矣爾
後作者紛紛競為闕誕違叛正道焚泯斯文致學者之
多歧遂務華而捨寔陛下汪懷墳索將抑百家文明之
朝如轉規耳然臣以為焚之則為非法不若化之以道
教之以正自今以後凡朝廷詔令之文貢舉詩賦之目
毋用諸家之語必以六經之義上之所好下必甚焉是
以幅員之內庠序之問不禁而自絕不令而自從競諷
周孔之言共排楊墨之語諒不數歲盡變其風洋洋乎
雅頌之聲可以翹足而待矣制策曰貢舉之說茂異斯
求爰自唐朝獨考辭賦雖云小辨破道壯夫恥為然而
定妍否於有司觀工拙於作者苟或舍茲銜石誠慮失

之毫釐將俾俊又用章文風丕變其用何術以副虛懷
臣聞王者不能獨治天下必擇良能而共之故公卿大
夫必選於俊又俊又必取於多士曰代薦賢諸侯立三
道之制兩漢求士公府有四科之選得賢之盛無以喻
之魏晉已降南北離隔其間制度無可紀者隋室立進
士之科李唐崇大其選國家寵興亦循其制網羅賢俊
時號得人若辭賦之試聲律之限蓋非古也而取一時
之工為陛下必欲革之而取茂異又何患妍否之難定
哉臣以為今之取士其甚可疑鄉舉里選之制未盡明
察言觀德之規未盡復夫鄉舉里選所以擇其行也而
寄貫冒籍者有焉察言觀德所以擇其材也而矯厲虛
譽者有焉所以薦貢之始不能皆知其行明試之際不
能盡擇其文以是爵命之間不能無濫臣願陛下先明
鄉里之制次謹言德之規然後試以策論考其康濟非
經意不得以對非常道不得以言則清濁自分才德可
辨文風丕變又何遠乎制策曰禮有四民農居其一書

有八政食在其中務勸力耕亮由薄歛或輕其賦調即
邦家之用不充或重彼科後即編氓之力彌困至於權
酤之法閔市之征將以惠人亦思省去復慮經費不給
游惰寢多蓋欲蠲復民租不禁山澤野無曠土府有羨
財下靡趨於末利上益豐於儲蓄必有說也宜無隱焉
臣聞語曰百姓足君孰與不足百姓不足君孰與足故
先王敷政設教惟務富庶藏財於民取之以道府藏益
而國用充元元安而百姓遂國家仁惠周普刑政簡清
但財賦未充管權未罷其故何哉臣以為務農之制足
食之本歷觀前世蓋有道焉三代之際其詳闕矣姪嬴
而下莫盛於漢臣請為陛下以西漢之事言之夫漢當
文景之際民田三十稅一而侯王分土各食其租閭梁
緩征算之制民間有斗酒之賜四方常貢其入至寡而
太倉之粟流衍而露積京師之錢貫朽而難校守閭閻
者食梁肉阡陌之馬成羣今國家地廣前代履畝而稅
山澤舟車之賦鹽鈇筦榷之利一歲之入十倍漢初而

用度豐盈未能相當其故何哉豈非游手未去重職未省冗兵未減仙釋未戢曠土未闢珠玉未棄游手未去則趨末年利之弊未盡止重職未省則稍廩供億之費未盡節冗兵未減則糧餉優給之用未盡一仙釋未戢則邪偽蠹耗之源未盡閉曠土未闢則耒耜禾黍之利未盡獲珠玉未棄則梯航楛楛之路未盡塞是以南畝之民執耒而耕者無多人矣故陛下雖躬行節儉憂勞日昃而制其歲用則尚有未豐議緩征算則將行復止者良由是矣願陛下禁游惰以沮勸之典併重職以簡易之道去冗兵以稽閱之法抑仙釋以正直之規開曠土以優復之令棄珠玉以儉素之教則官府之用充仞而山積億兆之生敦厚而日富豐食之道又何難哉制策曰宰字之任蒸黎所託在乎銓擇尤所注懷亦嘗閱考績於明廷聽保任於端士暨於涖職繼以敗官或邊幅罔修簞簞靡潔或佩韋罕誠冠虎是侔雖國有常刑而民已受弊今若峻其督責必興嘆於凝脂緩彼簡書

將漏罪於疎網水火相濟琴瑟改張爾其謂何予寔翹
想臣聞生民之命繫乎縣邑故進任宰字在乎擇人當
進者進則法令明政教達姦宄絕私謁息不當進者進
則王澤壅刑辟濫邪偽起苞苴直行故古者仕不妄進臣
不虛受蓋恐下民之受弊於匪人也國家之制弊古齊
聖而州縣之吏率多暴慢不求潔白之名罔垂緩急之
戒其故非他也蓋吏道頗雜貢舉未正士則累場籍以
求第而不問其材吏則叙久次以求遷而不問其事未
嘗擇行於三銓但見分命於百里君子或淹久而後進
小人或夤緣而先達復循唐氏流外之制盛開百司恩
澤之路選調既集皆補令佐蠶食元元干冒憲網詳觀
其弊良不遠比况復考課之法未盡行論荐之科未盡
至按察之使未盡公激勸之賞未盡重臣願陛下因革
百王詳觀兩漢采諸家考課之法而明其殿最嚴百
官論奏之典而禁其趨附選天下公正之士出分八使
之車擢州縣循良之吏入補金閨之籍是則黃綬之間

競為良善又何有凝脂之嘆疎網之虞者哉制策曰緬
惟致治誠在得賢每恐下僚寔沉英彥或以類舉或自
薦陞負廉隅清白之名常從加等馳幹蠱瑞方之譽亦
示峻遷然而鮮覩徇公頗聞濫進始由朋黨終陷刑章
言念於茲夙夜無已欲使懷材者必達荐士者絕私奏
牘上陳美惡可復爵賞下降名實罔遺極言澄汰之方
用資宵旰之慮臣聞王者前荒垂纁無為而治必舉賢
哲用為股肱故類舉之典君子所以達已知也自荐之制
英主所以拔寒畯也皆有國之規短求賢之軌轍然則
類舉不正則朋黨者達自荐不寔則僭濫者進必在乎
以經義而制之謹按春秋書吳子使季扎來聘吳夷狄
也稱子者善使賢也故進之春秋之義身賢賢也使賢
亦賢也又按書云舉能其官惟爾之能而今之論荐或
非經意保住之法頗重得賢之賞未行夫經以使賢者
為賢舉能者為能若舉狀繆者既黜舉狀寔者未旌則
賢能之士何以勸勵夫賢能不勸則為善者怠為善者

急則欺妄者進矣於戲自荐者權也古者帝王慮臣下妨寒賢路乃為之制在陛下裁之而已若類舉者道也一日廢之不可伏願陛下命所信任者各舉所知則棟梁柱石有餘材矣然則國家之大柄王者之利器賞罰而已陛下明其科條以馭荐舉不容應侯籍橐之請而舉胥臣先茅之賞是則懷材必達荐士絕私可以復其美惡而不違名實矣臣誠不佞固知忌諱四備清問憂惶跼蹐但幸遇陛下設直言之科臣應極諫之召聖策許臣靡悼後患夫賤士之慮思補聖政萬分之一惟陛下少賜宸覽寬其鼎鑊則昧死幸甚臣謹對

欽定四庫全書

文莊集卷十三

宋 夏竦 撰

進策

議職官

臣聞官必正名職惟守器稽考古道職官惟稱自雲紀
 火號之立龍名鳥氏之設則有司存各供王事堯命羲
 和分掌四岳舜陟帝位官名攸序司空以宅百揆司徒
 以遜五品士典刑服虞掌上下秩宗以主三禮典樂以

諧八音垂若予工龍允朕命夏商官倍其名罕見五長
分治方國六卿咸主軍事官告陳于左相百官聽于冢
宰姬旦踐阼憲章昭脩太宰授之以治法地官責之以
教象宗伯主禮司馬布政秋官主典刑之任冬官司考
工之職凡百有司皆正服位春秋列國陪臣命秩亡秦
尚首商君立爵祖龍誇詫多設官名劉氏因緣遂成典
故若漢官之制定名於祿百石而上差等十六或中或
比頗正序列魏文盜漢乃設九品拓跋割據爰分階從
梁氏置戎號之官隋室廣殿中之任其間南北離割羌
戎猾亂兵革薦仍禮樂無度官以漸替職亦旋失有唐
啟祚創置相因逮其末齡官號滋雜姑息將帥多加使
令五代因循官次相近國家削除前弊稽考故實損益
沿革時謂適中但百執承事理有可疑建官分職職與
官殊量材受爵爵與材異或隸官棘寺翻司大倉之粟
繫職青宮乃主閔市之征或呼為博士不通章句之學
號為著作罔知筆削之事或終年典禮未聞因損之議

連歲執法詎有彈劾之號或明科律不登讞獄之司長於規制難希諫諍之列或寺人命秩於方牧降人受寵於通籍位以資升或過其材官以久遷或非其事人皆謂官為請俸之具位乃稱呼之號名實相違不可以訓語曰必也正名禮曰各司其局傳曰惟器與名不可以假人又曰一日失職則死及之故宣尼嘉虞人之守官仲康罪羲和之離次蓋官不易方守不假器陳力就列臣無虛受沐猴非戴冠之物方枘非圓鑿之偶函矢之業不同庖祝之任有殊傳曰其人存則其政舉其人亡則其政息又曰國家之敗由官邪也任官之道可不慎與誠當稽堯舜之事行三代之法正其官司辦其職掌使上下之位無或僭差彼材彼技授之彼官此職此位付之此事位不以資惟其人遷不以久惟其材寺人可以厚祿而不可以峻權降人可以鉅賜而不可以華資若守帑藏倉庾之物主監權督責之局可別制官號畀之典守隆皇宋之禮法敬守文之功業傳曰名位不同

禮亦異數周官曰以儀辨等則人不越蓋任官惟賢不可不擇名以出言不可不正擇其賢則職舉職舉則政成正其名則事順事則禮備立政自官始惟陛下志念狂簡寬貸萬死則天下幸甚

慎爵祿

臣聞周官曰以賢制爵則民慎德以庸制祿則民興功蓋爵以待賢祿以待庸賢不及爵爵非其賢則民慢庸不及祿祿非其庸則民惰慢則廢德惰則無功故先王重車服慎器名崇德報功以教天下國家鑒三代典章采漢唐故事文質彬彬不遠中道在於授受猶有所疑何則王者撥亂反正自家刑國賢哲並起攀龍附鳳及其功成治定猶議賢而封計庸而賞豈有守文之君應天承祖恭嗣皇器而藩邸臣僕驟升清貴若師傳之官贊佐之吏輔翼之功宜被寵擢而鞭綬之御導從之隸競乘輅車爭受命服歲月之間遷擢非次以新聞舊頗為無謂昔仲叔于奚請繁纓以朝仲尼曰惜也不如多

與之邑唯器與名不可以假人其是之謂歟代頽陛下
崇不諱之德來狂瞽之議改立名制垂法萬世使日月
之光流被子孫

議選調

臣聞古爵五等裂地受封各命陪臣咸思俾乂秦滅六
國分為郡縣百世因仍遂廢古制天下之治歸州縣州
縣之治歸庶官歷代以來實難其選設吏部之曹張銓
品之官鑒裁不同處置各異自非毛玠之尚苦節陳羣
之建九品山濤之識量任愷之忠直王泰之接待辛術
之正明高孝恭之藻鑒裴行儉之博識欲其材器無遺
與奪惟允雖志誠竭力猶將不逮唐室之制入仕多門
調選之間轉為繁總格式既冗貨賄滋豐九流遂失澄
清官序遽成陵替國家膺天成命司牧元元分命庶官
共治天下銓衡劇地公朝急務長定之格選集之期考
課之規各有攸序奈審覈注擬出入多塗請求之賄旁
午如雲令史之門衣冠若市貪夫優游于常調廉吏憤

排于選門能材且患于循資庸器自安于久次以至州
僚縣佐頗有廢事曠官一吏不循千民失所蓋吏部不
勤慎擇多士有曠精求負乘貽災維鵜致誚紆民濟物
諒在伊人誠當委注賢明專幹銓選竝稽往制擇善而
從但人數寡少則題品易至賅賂不通則轉遷易公如
其不逮抑之散地若有上材擢之非次無使愚出私門
推歸吏手則精麤可別勞逸自分但衆官懷僥倖之心
即萬國有治平之狀

過權要

臣聞祿不期驕而驕隨之位不期勢而勢隨之驕隨于
祿則請謁者行勢隨于位則附會者衆春秋則陪臣擅
命兩漢則外戚弄權或近習怙寵姦閹亂法故士重抗
衡人安左宦直言陵折不辜伏次骨之刑回面阿從無
功居當路之職魏晉隋唐其弊滋稔自非天生聖君代
出良士雖竣其防猶或踰之國家應運革去前弊抑外
族之權薄近臣之寵而猶肺腑之屬請謁所先貴游之

家聲勢相尚或身棲館舍拾高科如地芥親忝葭莩履
青雲如平地巧言枉道乍要好爵矯辭內任或忝薦紳
君子不必以言揚賢材不敢以直進伏遇陛下丕奉天
德威揚震耀日月之光洞達幽遐願觀狂言陰察時弊
有犯無隱不任戰懼

退巧宦

臣聞易曰王臣蹇蹇匪躬之故誠以君子修身踐言策
名委質垂紳佩玉祿廩所豐雖夙夜憂勤盡瘁事國犯
顏色觸忌諱致君濟俗猶恨無補况季世澆薄忠信凌
遲以巧詐為良圖以搢紳為美利司馬安四至九卿漢
君子耻其巧宦盖官業固殊商販公朝豈尚諂諛直道
事君三仕三黜與夫蘊畜巧心陰射上指致位卿相者
豈同日道哉國家選用忠純精求黎獻中外輯睦遠邇
肅雍奈人心如面不能咸一或用取冗效而乖大體謀
私利害而忘公家至有起自賤微驟登官路強為明敏
剖析秋毫事至細微動煩旒宸謀身千計媚衆多塗觀

古良臣頗殊于是雖陛下法象天道恢大皇綱拯卹齊民招徠諫諍而上下之吏巧宦尚多或濫施刑罰張皇威望修飾厨傳沽買名譽或妄獻謀畫炫耀心計陰行寵賂構求薦舉上負國恩下速民謗誠當廣示詢問深究弊訛抑退纖偽優用蹇諤稽復西漢之制歲馳八使之輪特遣英賢專任剛毅按行方國分驗治狀明賞信罰以御其下去邪決壅以蘇其民使清濁派分遠邇繩直則公家之惠膏潤四海陛下聰明無遠弗届

制流外

臣聞張官設吏求材審能官司攸叙百姓允治古者旁求雋彥周制論辨材能六國談說受官嬴秦農戰入仕漢則孝廉有道之舉方正秀茂之科上計之制任子之令魏晉而降取士多門制度云繁官塗益濶唐草隋命因損舊儀置勲品九等自諸錄事及五省令史始焉謂之流外由是府胥獄掾垂帶拖紳名器忽矣陵遲官府莫之統一國家經始尚循唐制百司伎藝皆收之選網

守當之名勒留之號歸司出職頗繁有徒一命親民多
乖治狀濟其抗弊抑有成規蓋府寺之吏書筭之工因
循久次不曉藝文及預官常何知政要可令申命司屬
各限通一小經選集之期量加試難少識前言往行必
知樂善嚮方不惟文德慶敷由是蒼生受賜願觀往古
以適時宜

議國用

臣聞四代而下莫隆乎漢漢莫盛乎文景觀乎國用亦
以足矣古者什一而稅漢氏行田或三十稅一而錫賚
勲戚勳以萬計牛酒布帛米肉之賜屢至民間是時子
弟分食租稅罕入縣官匈奴寇邊諸侯連禍兵革數起
飛輓不絕官無鹽鐵之利門無舟車之筭而民不告勞
國用滋豐京師之錢貫朽難技太倉之粟腐敗不食阡
陌之馬成羣守閭閻者食梁肉其故何哉國家開拓疆
宇幅幘億萬東南漸海西北暨戎內無列侯之國歲無
民間之賜茶鹽金鐵之利水陸關市之徵履畝而稅權

酒而酤即山鑄錢臨海市舶一歲之入十倍漢初而用
度區區未能豐羨非事勢不足抑取與之未至也夫民
樂負販俗尚奢泰十夫里居游手太平仙釋之蠹巫覡
之耗并蕪之害吏胥之暴旦夕而有故元元爭欲採山
煮海執技列肆以邀美利息棄隴畝未始禁之及其俗
弊將若之何夫文景之世賤商賈通閩梁上敦儉素之
化下無佛老之弊去肉刑舉賢良削父子相坐之律除
誹謗妖言之罪耕籍田以勸農業降惠令以開民利減
服御損卽吏惜百金于露臺施瓦器於霸陵代馳道填
蘭池人無禁錮之律馬無食粟之侈采金銀珠玉者坐
以贓盜論故人人自樂趣本去末服勤穡事百姓足矣
君孰不足皇家休息四海五十年間遭遇陛下天意淵
默聖政日躋承二帝之基當文景之辰四夷拭目仰觀
太平伏願鑒漢興之事隆聖宋之業去無益禁游惰擇
良吏敦稼政儉以率下簡以御物儉則用足簡則文寬
用足則財生文寬則俗阜春秋之義王者體元以居正

體元則足以御大中居正則足以簡嗜慾建大中則簡自至矣節嗜慾則儉自至矣倣文景之治體春秋之義孜孜為善雖林勿休不十年間則國用充牣風俗敦厚仁義可行法令可措猶將與三代相上下豈止於漢氏之比哉

去冗制

臣聞經國以體馭賢以爵國以體立必也宏遠賢以爵貴無或僭濫體國不大則制度叢勝爵賢不正則服位陵替仲尼曰惟天為大惟堯則之大體之謂也又曰惟器與名不可以假人正爵之謂也故善為國者存其大體而削其叢勝用其正爵而去其陵替然則大中之道行于典憲矣國家誕膺駁命奄有萬國稽古垂法彛倫攸叙然承唐氏亂離之後撥五代分競之基冗制因緣或未全去臣聞身被命服即為王臣除官授職必聞賜告豈有卑品之官州縣之職將拜絲綸之品乃輸綾紙之錢有識之徒誰不理鬱况軍國之用動以萬計府藏

之實何俟於此忍使壅之王澤責之泉布又聞唐室衰弱兵在節鎮麾下從吏官皆假版皇家受命政出天子州郡職員因循舊式豈有笞撻之吏輿皂之後階叙銀青銜稱檢板或兼烏府之官或假青宮之秩禮制之間無乃僭矣惠愛之道在於此乎誠當特降詔書並削冗事諸如此比一切刊正書之信史垂耀百代

省錫賚

臣聞三年而郊古先王禮鬱鬯馨香昭事上帝歷代王者功成治定皆謹肆類永懷多福國家圓丘或禮比隆三代誕鴻恩行慶賜百官舞抃幅員胥悅但兵衛至衆頒賚至多府庫之實供其費中民十家之賦禁衛一卒之賞五代亂離四方多事務推金帛姑息將吏聖宋有開因仍難改去之恐三軍缺望存之則支費無量山海之利桑穀之賦取之銖兩散之鉅億為國之計頗殊經久古者井田之法率民而戰今之軍伍祿養所豐旦暮受錢穀暄涼受繒絮居有連營行有駮駮遭遇郊享復

單厚賜夫兵不可富富則驕驕則內顧內顧則戰心息故善為將者使兵無餘財今若即更舊制必用釐草莫若別置軍衛之名統以將軍之號隆殺部伍高下其祿自百至千差為十等始則重加召募便從末部隸名滿則歲較伎能稍稍陞其等級不惟懼心浹洽無使武藝屬精然後限其糧級無使別有覬覦舊兵漸以耗少新士且無規例不數十年陰省其費弓劍之習勇悍之氣戰鬪之心必愈於今然後可以輕賦斂寬筦權垂遺子孫足為良計

均賦斂

臣聞禹貢之典九州異賦周官之制五地殊征相其土宜平其斂法輕重等而民樂輸遠邇一而國章立夏后氏五十而貢商人七十而助周人百畝而徹雖皆什一之通制蓋有公田之定式國家疆理萬國敷同聲教務推惠育休息元元而地征之法未盡均一或同都鄰高下不等接畛聯疆桀貊有殊或地廣而稅鮮賦多而田

寡或不腆受沃行之征上腴當薄鹵之賦植稻粱而課
菽麥無桑柘而責爾稅官府由是生姦毫右于焉得志
無告之民積於罷敝伏願陛下霽雷霆之威采狂狷之
辭申命有司特著稅令辨肥瘠之地定輕重之法分科
列目第為九等上田十頃當賦若許下田百畝當稅幾
何分詔能臣頒行天下履其地力哀多益寡斷長補短
陸耕水耨並正其征沃野敝田各平其歛標列版圖百
世不易垂之後嗣聖法可觀下民之患自除猾吏之欺
斯絕易所謂聖人作而萬物覩者也

順時令

臣聞帝德法天地號令象四時八世之君靡不攸行春
夏去桎梏無肆掠挺重囚出輕繫秋冬征不義嚴號令
察阿黨校田獵蓋陽德發生長育在候靜事無刑以順
景風商氣肅殺閉塞成冬論獄報罪以準陰德漢制春
夏不論重刑新莽盛夏殺人于市萬方怨咨不勝其虐
蓋王者不可逆天時逆天時則民怨民怨則和氣戾和

氣戾則旱蝗妖青無所不至矣易曰仰觀乎天俯察乎地又曰應乎天而順乎人語曰惟天為大惟堯則之詩曰不識不知順帝之則書曰欽若昊天厯象日月星辰皆謂王者法天之道也國家應運承統光啟三聖布和行惠澤潤幽遐但論決之科有殊經義下臣愚昧私心疑惑伏願陛下守成之規議變法之患詳觀六籍取法四時頒詔郡國著為定式應立春以後立秋以前不報死刑式符時令俾萬方知好生之德天和無傷戾之妖世而後仁誠在斯日

禁淫祀

臣聞聖人之制祭祀法施於民則祀之以死勤事以勞定國則祀之能禦大災能捍大患則祀之非其倫擬不籍祀典歷代法制多禁淫祀蓋黔黎無識贖神右鬼妖巫憑之詐降靈異元元從祈禳厭勝且鷄豚醴酌祀無名土木貧者貨鬻以供祭賽村聚里閭廟貌相望春夏秋冬歌舞薦仍民產益薄而蠶食滋甚以是而觀頗殊

至治仲尼曰非其鬼而祭之諂也國家道化風行光被八極鄙遠之民尚循沅弊誠當峻示科條禁其詭誕杜齊民蠹耗之源抑巫覡妖怪之本若垂之典法乃當庶一端風俗無邪式臻康泰

賤商賈

臣聞周禮曰商賈阜通貨賄傳曰通商惠工蓋成四民之業以通天下之財然則懋遷有無美利三倍游手之民爭趨負販先王之制有以賤之漢興察亡秦之弊抑浮惰之業應賈人衣錦繡乘車馬名田為吏皆從禁絕謫以戍邊美比奴婢尚有積貨累鎗擬封君者况乃貴之乎國家奄有華夏車書萬里而經營之制未逮商旅至有持梁蠶肥擊轂列第妻孥服珠玉奴婢衣紈素晝思積滯之計夕念蕪井之術或駕馭州郡頗為豪橫束貧民于穀中邀美利于天下在賦役之課優容于農家闕市之征姑息于平民衆以為法賤稼穡貴游食皆欲貨耒耜而買車舟棄南畝而趨九市臣竊恐不數十年

間賈區夥於白社力田鮮於馭僮願陛下用漢高之制
察桓譚之議法賤其類閔倍其征立車馬之禁限衣服
之儀少以抑之則去末反本之心生矣

論將帥

臣聞將者人之司命國家長城將相之任非材不居求
材之道斯為難哉若以頌首胼胝為壯則秉鉞非角觝
之戲以巨觴大炙為勇則建矛非飲食之場以彎弧提
劍為疆則上將非一人之敵以遭逢故舊為忠則三軍
非恩澤之任在觀其器能察其性情輕者易忠躁者易
脫狠者易激疑者易動驕者易誘弱者易訕剛者易誤
况其材不同而其任復異任文儒則懼其畏懦任英武
則防其跋扈任剛勇則慮其寡謀任庸鄙則恐其敗事
是則幅員萬里殆無將業豈其選任殫之良規但赴赴
之夫良多客氣既昧今古孰知成敗春秋卻穀為將敦
詩說禮戰國孫吳論兵文動辭采漢興曹參趙充國祭
遵盧植魏晉諸葛武侯杜預羊祜唐李靖郭元振裴度

或立戰功或為名將觀其武略抑資文術以是而觀可
否自分前事元龜後之法則但能精選文臣材兼智勇
若多識前賢事迹必資通變機籌授之斧鉞臨事可裁
然後旁選英雄列為裨佐以勇佐謀舒急相濟謀者足
以制敵勇者足以冠軍二者有方則師律正矣

計北寇

臣聞外裔薦食邊境為日久矣周道中興宣王薄伐秦
氏孔武逐之塞北雖築長城終非良策漢高北伐師挫
白登奉春獻議乃約和親供給至豐寇掠無厭太宗之
年侵軼岐雍孝武窮兵藁街秉律精銳深入摧敗醜類
甘露之中呼韓款塞當是之時敵勢微弱中國懷禦蹕
密有宜新莽盜漢寇心復戾世祖中興敵分南北勢既
携離邊防稍泰竇憲總師遂破其種逮及桓靈復患寇
鈔漢祚綫絕中原瓜割五部恣爭南北分裂周隋之際
突厥驕矜戎后內入宗女外降唐室有開邊境多虛涓
橋之陣文皇盟載雖李靖之擒討蘇定方之破滅邊鄙

之間不能無害聖宋龍興廊有諸夏桑穀之賦山海之
利勇悍之士金草之物無有遠邇皆入縣官獫狁之寇
猶北唐漢非勇之不足枝梧抑敵之梗于疇昔自幽薊
陷敵之餘晉季蒙塵之後中國器度工巧衣冠士族多
為犬戎所有迨今六十年間益稔兇狡多誘中原亡命
之徒善構塞下生事之輩狼貪嘯聚苦于邊邑前年冬
寇我北鄙暨于澶淵將帥之臣嬰城自守生靈膏血腥
汙原草自非陛下拯救元元親馳草輅匈奴之氣未易
當也洎乎天威震耀敵人喪膽遁迹無所獻款歸命陛
下赦其鯨鯢寬其翦滅要以日月之盟質以丹青之信
若能悛變野心永懷至德紓民偃革大為長策誠恐貪
欲之心久而益甚若絕棄虛之寇必有無已之求從之
則虛府庫而資寇盜拒之則積怨心而起驕慢為國計
者其猶病諸莫若明待以信陰為之圖以臣料之非難
事也夫匈奴之衆勝兵者不過二十萬糗糧不過數日
輜重不過數乘長于寇鈔短于守禦利于騎鬪鈍于步

戰便于弓^矢拙于劍戟以其兵不及中國五分之一以其用則不及中國十分之一以其伎則不及中國三分之一比年寇虜疆場之臣不能捍者豈天時乎抑亦將之不省兵乎夫敵之寇盜無代無之若其敗滅固有時矣陛下必欲恢復塞垣清謐邊陲在擇將帥而後議之

復塞垣

臣聞匈奴以北有陰山草木茂盛冒頓依阻寇虐中州漢奪其地邊用少安匈奴過之未嘗不泣夫有一陰山猶資敵勢况衰晉不武盡割燕地幽薊雲朔良田沃野以之界敵得無疆盛由茲訖醜轉為邊患故國家懷之以文而不庭加之以武而不至要之以盟而無信賂之以貨而無厭憑陵我邊鄙虐害我生靈自邇以來為患非一盖不復塞垣而勞扞禦猶張踈羅以隔蚊蚋秦趙築長城漢築五原塞因其山谷設為險阻先代之勞後王之利不惟經畧有方兼使中外有限應變無壅深詳其理欲為萬世之畫削匈奴之勢莫若復漢故地外銅

塞垣復地之謀必資良畫誠當計其寇敵選其將帥明其兵政謹其邊防制其閭外皆如所言然則陽示畏弱陰整用度命將領之臣修李牧之法訓兵利器明賞信罰按行營壘親視疾病膏之以恩惠勞之以言辭同其苦樂和其上下整其騎乘名其等列習其擊刺養其勇銳於是豐其金帛陰賂間使訪山川紆直之勢察彼將助好惡之性相其機而觀其變因其釁而發其謀疑其君臣焚其積聚優寵降附撫綏邊境令幽薊之民積思漢之心匈奴之臣有叛主之計乃選一良將為之謀主陰勒士馬出其不意夫今之邊界距塞垣裁二三百里匈奴入中國之路不過四五及其險隘不濶尋丈若分騎兵之甲杜薊門之路出并岱之弩守蜚狐之口然後正兵數道攻城畧地先平小邑以阻其氣次克大城以觀其變匈奴不善嬰守救兵無路而至幽陵朔易不降即潰乃命良臣以葺邊塞留飛將以扞禦復修亭障遵漢舊規則邊馬之塵罕能南暨矣

禁宦寺

臣聞天地交而陰陽和陰陽和而萬物生故牝牡之分
雌雄之配鳥獸魚鱉咸以遂性夫有男女然後有夫婦
有夫婦然後有父子有父子然後有君臣故易以咸卦
為下經之首詩以閨睢為國風之始周官曰以陰禮教
親則民不怨故聖人法天地之體行陰陽之化一物失
所以為不可臣聞古者因下服之刑制閹寺之官周禮
寺人五人內臣倍之漢初置中常侍二人今之宦者何
踰古制又皆平民子姓齧齕丐養無辜遽遭殘毀受刀
鋸之苦失男女之性阻夫婦之配絕繼嗣之道上傷和
氣何虐如之出入殿廷不減百數稽之天道考之古義
臣竊感之夫夏后泣辜傷教化失所湯武解網懼鳥獸
罹害西伯墓枯骨天下歸心漢文去肉刑百姓稱仁豈
有有令非罪之民受椽割之刑自生至死不可復完伏
願陛下迴兩曜之鑒推二儀之惠布造化之恩順慘舒
之氣峻立憲章一切禁絕則漢唐之弊革於公朝堯舜

之心感於天下矣

欽定四庫全書

文莊集卷十四

宋 夏竦 撰

進策

陳邊事十策

今月八日陝西安撫使天章閣待制龐籍等到府奉傳
聖旨商量西鄙事宜者竊以繼遷一族本党項遺類居
呼韓舊地東薄銀夏西至靈鹽南趣廊延北抵豐會迤
邐平下輻員千里太平興國中繼遷逃背鳩集萬騎屢

寇朔方歲發兵夫送糧草每邀險肆掠為害不一至道初特遣洛苑使白守榮等率重兵護糧四十餘萬遇寇浦洛河兵夫潰走自相蹂籍糧卒並沒守榮等僅以身免朝廷旰食閔輔騷然太宗皇帝召宰相議之呂端始欲發卒由麟府丹廊延環慶三路趨平夏襲其巢穴太宗難之且曰三道深入用甲卒幾萬何人為將帥何人護輜重表裏砂磧何處會合須更熟籌不可輕舉是時邊患方深議者不已至秋遂命李繼隆出環州丁罕出慶州范廷召出延州王超出夏州張守恩出麟州五路趨平夏竭內帑之國財罄閩中之民力繼隆與丁罕合行十數日不見賊張守恩見賊不擊相繼引還王超范廷召至烏白池以諸將失期士卒困乏而回此際先臣隸於廷召備見輕舉之害然是時繼遷當兄繼捧入朝之後為曹光寔掩襲之餘遁迹之迹窮蹙可知涼州博囉齊沙州曹延祿皆受朝廷節度使犄角追討靈州河外大涼小涼河西北威擦勒等十大蕃族皆有讐怨願

助國討除尚猶累歲積年不能撲滅太宗又問宰相曰卿等莫別有擘畫當時宰相但錯愕莫之能對太宗亦不悅久之先皇帝即位鑒追討之弊愍閔輔之勞惟戒疆吏謹烽堠嚴卒乘來即驅逐去勿追捕嘗出陝西地圖自指山川堡塞示宰相令移兵簡費又以涇原地最要害屯兵甚衆命增置鈐轄都監以備奔軼此寔先帝之聖斷遠圖也然拓跋之境自靈武陷沒之後銀綏割棄以來假朝廷威靈聚中原祿賜畧有河外役屬小蕃德明元昊久相繼襲貿易華戎捃剝財用拓地千餘里積貨數十年較之繼遷勢已相萬其於妄作名器僭製車輿跨咤旃廬跳梁沙幕亦有日矣朝廷待以蓑服置而不問芻豢過飽猖蹶遽彰所宜誅夷以塞公議然而兵者凶器戰者危事聖人不得已而用之自昔兵家皆欲先勝後戰則舉無遺策以繼遷窮蹙比元昊富寔勢可知也以先朝累勝之士較當今關東之兵勇情可知也以興國習戰之帥方沿邊未試之將工拙可知也繼

遷迓伏平夏元昊窟穴河外地勢可知也若夫分兵深入則軍行三十里自齎糧糗則不能支久須載芻粟則難於接送師行賊境利於速戰儻進則賊避其鋒退則敵躡其後晝設竒伏夜撓營柵師老糧少深可虞也若窮其巢穴須渡大河既無長舟巨艦則須浮囊挽綆苟賊列寨河上以逸待勞我師半渡左右夾攻未知何謀可以捍禦臣以為不較主客之利不計攻守之便議追討者是謂無策若繕完壁壘修利器械約束將佐控扼險隘但輒過於歲月不豫於勝負是今之常制也則慮體分勢異衆力不齊曠日持久軍食難繼事不先定則有後憂若威以文誥格以干羽勝決帷幄師行衽席必有成算繫於前籌此非臣之所及也臣今但有十策十事列上如左

一今之關塞延安險阻秦州地遠易為控扼所最憂者涇原次則環慶涇原莫急於鎮戎環慶莫急於慶州戎人狡獪必不肯舍平易而趨險阻此敵情

之易料也古之用兵皆擇其精銳先當矢石謂之握竒跳蕩是為竒兵其次疲軟則以守城壁近年之弊強弱兼用強為弱累戰多無功又中國長技莫先強弩近年之弊叅以他兵不能專用已長攻彼之短今若令涇原環慶兩路各於土兵禁兵或弓箭手內擇弓刀鎗槊手三二千副之涇原令高繼嵩張亢王之環慶令劉平趙振主之日夕訓練常如寇至如有警急則令自涇原界望環慶路橫絕邊徼數百里間往來交擊互為首尾傳矢持滿俟中而發一發萬矢三得一中則十發之矢以殪三萬餘人羌戎羶毳不易支也仍乞立為強弩指揮特升兵額稍增月給以震軍聲以壯士心但恐賊界聞有此謀必不敢容易窺塞其偏裨將校道路堡塞並委劉平等臨時選擇處當此寔制勝之大端也

二緣邊熟戶號為蕃籬除延州李金明胡繼諤二族

與賊世讐受國厚恩勢必向漢自餘熟戶如二族者十無一二羌戎之性貪利畏威若不結以恩信憚以威武而欲倉卒驅之禦敵漢強則助漢賊盛則助賊必矣其敏珠爾等蕃族又納質賊境居既首鼠戰必倒戈元昊窺見此隙所以勾招打虜脅以鋒鏑誘以貨財國家非不知其若此所宜速見良畫深破賊計及早羈束以固藩籬此西陲之急務也臣前後累狀陳啟未蒙開可伏乞采臣前奏下臣令勘會逐州部族首領量人馬事力授以職名第給祿賜蕃官俸料至微所費不厚若控制有宜得其死力則為利至大或其間向漢不堅即令重納有力量質子或有自恃兇強招撫不至者則令劉平等非時伺便以強弩屠其種落此策若行足以破賊計而張國威也軍志云先人有奪人之心伏乞觀此事機早賜裁定

三甘涼首領河西大族繼遷賜爵之後德明承襲以

以來仰恃國威吞噬畧盡回鶻吐渾去朝廷地遠
 難收其效唯有吐蕃與賊世仇置勒斯賚住總噶
 爾賊巢穴轄戡來都錫據賊上游臣累奏乞詔置
 勒斯賚進討破賊之日許以西平之封授二子靈
 夏節制又乞遣使都錫撫存轄戡令父子和協共
 力破賊未奉回音竊慮議者以為元昊既破地入
 吐蕃則置勒斯賚勢大復生一敵此議乃計之不
 熟者也平夏逆黨習於劫掠吐蕃雖衆兵技不敵

但欲使且牽賊勢必未能盡平狡穴若此際不叔
 寔効而徇空言非國家之利也伏乞采臣前奏早
 賜指揮先朝博囉齊克靈州西面都巡檢使尚欲
 蠻夷相攻遙制邊賊况今置勒斯賚向化父子受
 官不於此時遂其忠憤差之毫釐深可惜也若前
 議得行必恐昊賊未敢輕離巢窟伏乞聖鑒深察

此議按宋史吐蕃傳置勒斯賚始居都錫城既居
 葉公城徙居總噶爾城後又徙莽沁又徙居
 青達置勒三妻喬氏生董戡其二妻皆李立遵女
 也生轄戡及瑪克占覺立遵死李氏寵哀斥為尼

置鄂州錮其子轄戩瑪克占覺結母黨李巴全竊
 載其母奔總哨爾置勒斯費不能制瑪克占覺因
 撫有其眾轄戩居康古此策置勒斯費總哨爾
 轄戩來都錫典史文不同未知孰是故附記之

四陝西四路兵甲不少但地有險易路有遠近寨柵
 有多少軍分有勇怯易防處合減兵難守處當增
 兵兵之增減即須察其險易量其遠近計其城寨
 均其勇怯使各盡其宜朝廷去邊陸遠但因逐路
 所乞差發士卒所以臣前後累奏乞均勻加兵今
 來伏蒙朝旨許令那移駐泊尚慮邊臣占怯甲兵
 鮮克公共方今西鄙唯涇原環慶最須備禦其兩
 路犬牙相入烽堠相望分之則勢孤併之則勢大
 物理之常也欲乞劉平罷鄜延安撫兼涇原總管
 所貴表裏相助首尾相應張大軍勢壯勵士心亦
 防邊之最要害也

五設使元昊謀犯邊境量其時勢豈能回路俱來必
 是擇一平易路分併兵衝突其餘邊界即分三二
 千騎往來出沒牽制我師此賊計之可前料者也

今來沿邊兵馬總而計之數亦不少若各守路分則不足互相策應則最近者雖奉朝旨許令互相照應竊恐緩急邊臣執守文義不肯分兵相援欲乞朝廷詳酌特降指揮有賊馬犯邊令四路互相關報分兵策應卽延可以策環慶秦隴可以策涇原若此則沿邊勢合軍聲大振是計儻行固足以預制狂賊也

六元昊旅拒以來陝西加兵所費糧餉不少尚賴累年閔輔大稔易為計置今夏稍旱二麥薄熟粟豆苗晚秋成未克設使元昊復稱臣納款沿邊亦未敢班師若宿兵塞上邊稼不豐持久之謀未知安在所以臣前奏乞令陝西諸州各招置神虎保捷等軍各一兩指揮令逐州訓練精熟却乞那移閔東兵馬歸回有警急則令逐州量留士卒外並勾赴邊臣一則關中土兵勁悍耐於馳騁二則減省沿邊芻粟三則可為悠久之計

七關右沿邊舊俗輕悍喜為寇盜山林深阻難為搜捕加以近邊蕃戶以截盜為業若敵騎犯邊人情恐動或飛輓稍頽丁夫逃潰互相扇搖聚而為盜關中官司不可不預為之計也咸平中陝西轉運司曾抄點保毅軍六萬八千餘人防城備邊今來西陲安靜多年若遽行此法則恐人戶驚擾別生寇劇前奏乞添置弓手三兩倍及乞置壯丁獵戶緩急可以防守城壁把截要害却那得正兵出入野戰此寔今之寓令也朝廷檢詳前奏早賜行下付臣當司差官添置候賊平日即却罷遣一則不費供餽坐獲其用二則不動羣情易為辦集比點保毅軍及抄弓箭手利害相萬也

八沿邊小寨多是曹瑋建置常時禦備仇寨防遏逋逃似有小利羌戎入寇則難於處當分兵固守則州郡勢危守禦不定則所蓄芻粟翻為寇糧又遠近傳聞亦是亡一城寨滋益賊氣且損軍聲欲乞

宣旨沿邊總管司勘會小寨有兵少糧多不關要害先支沿邊巡檢等軍馬就食盡糧草所有小寨逐月廩給却令就大寨旋請如有大段警急勢必難敵則令併小寨士卒入大寨把隘相殺一則免資寇盜二則併得兵力於要衝之處以禦奔衝九方今備邊之計最宜積穀故趙克國云糴三萬斛穀羌人不敢動矣况關輔稅租有限歲時豐儉難常若卒調兵食急賦橫歛則秦民輕悍咨怨易與此不可不預計也近者有詔入粟拜爵須是巨富之民方能佐縣官急欲望朝廷詔關中州縣有犯過誤連累之罪情願收贖者許令自保於沿邊諸郡入粟贖罪每銅一斤准粟五斗良民救患何止糶輸諒不踰年塞下之粟必稍充羨寬宥過誤全民膚體足以上副陛下至仁之德又慮議者以為國家全盛之際不當貸刑示弱此議亦思之未切也且爵者名器尚許拜授若寬刑赦過得粟便民

比之拜爵此為優矣

十候教習勁弩指揮招置土兵添差弓手各有次序
即乞委任當司差官揀選沿邊冗兵於近裏州軍
及減騎軍回關東仍省沿邊間冗吏員古者將帥
授命本朝皆假之威權許以便宜使得盡力今來
朝廷儻采所陳則乞特依古制借以銜勒令竭疲
駕仍乞指揮諸路總管司臣僚今後每事遵稟安
撫司指揮不得怯懦自謀妄說事理開奏上惑朝
聽如有寇賊奔衝並須出兵守險持重伺便痛行
殺戮不得披城玩寇放過賊馬令入他處如違以
軍法處分如此令行下則邊防畏懦之臣預謀戰
聞不敢只作守城自全之計

右謹具如前伏以國家富有四海重熙累洽物力全盛
忠賢間出昔魏有一段千木晉人不敢窺西河江左有
一謝安苻堅喪百萬之衆以此計之蠢爾羌戎豈敢輕
犯邊境但元昊資性克忍輕背國恩鬼得而誅滅亡可

待尚未授首朝廷之議不得不過為備禦然賊境最多
姦人盡知緣邊虛寔料其逆黨聚謀必須潛闕間隙方
敢作過若國家處置得宜任人不雜使陝西內外城邑
戰守有備元昊豈敢容易輕離巢穴自取敗亡况關塞
防秋古今常事傳云無恃寇之不至恃吾有以待之此
言誠得守邊之要也頃繼遷亡沒德明尚幼族中親屬
強梁者衆德明甚懼倉惶送款當時有司不能裂河南
之地封拓跋諸親令其勢分間起自相殘賊而乃併錫
真命愛一孽童數十年間祿賜奉養資寇糧者多矣至
今義士為之嘆惋是知此際巖廊裁處不可不深圖遠
算也臣素業刀筆不諳軍旅昨蒙推擇付以西事雖繼
陳方畧多以迂濶不合廷議進退維谷憂駭可知豈謂
天慈更容訪逮拜恩滙懇敢不自竭其所陳十事實是臣
在職見聞夙夜惟忖心慮所及咸罄於是伏乞聖慈下
兩府裁酌如稍近於理即乞特賜詳擇施行敢不虔奉
德音漸圖遠蹟然而成大益者忘小害獲遠利者無近

效方今許國者多言事者衆或不周知利害別議建明
 事未成間處有更改則邊臣之計惑矣此則須賴陛下
 倍賜主張勅左右大臣專主斯議自古內外相維則有
 成績羊祜杜預非張華主之則不能平吳石雄劉沔非
 李德裕主之則不能平上黨布在方策較然可知若臣
 所陳庸昧不遠前談徒煩聰聽無足采錄即乞早選能
 吏代臣經畧西事別詢奇畫免誤公朝矧將者三軍司
 命國家安危之主不可一日輕付常才忽於大計若西
 陲失備則他寇相因伏乞朝廷深賜哀察干冒宸嚴臣
 無任祈天懇懇激切之至謹錄狀陳乞以聞伏候勅旨

募土兵奏 附

陝西防秋之弊無甚東兵不慣登陟不耐寒暑驕懦相
 習廩給至厚土兵便習各護鄉土山川道路彼皆素知
 歲省芻糧鉅萬且收聚小民免飢餓為盜代兵東歸以
 衛京師萬世利也偕欲以寡擊衆殆虛言也 按宋史疎
當時頗採用之其募土人為兵令下而楊偕奏言西兵
 比繼遷時十增七八縣官因於供億今州復益一二千

人則歲費不資若訓習士卒使之精銳選任將師求之
 方畧自然以寡擊衆以一當百矣竦云土兵訓練可代
 東兵此虛言也自德明納款以來東兵猶不可代况今
 日乎朝廷下竦義竦秦云云借復奏云自古將師深入
 虜霍去病止將輕騎八百直葉大將軍數百里赴利斬
 捕過當又將萬騎踰烏盪討邀僕浹狐奴歷五王國過
 馬支山千有餘里合兵慶臯蘭下殺接蘭王虜侯王執
 昆邪王子收休屠祭天金人趙充國亦以萬騎破先零
 李靖以騎三千破突厥又以精騎一萬至陰山斬首千
 餘級俘男女十餘萬擒頡利以獻自漢以來用少擊衆
 不可勝數竦在涇原守城壘據險阻來則禦之去擊釋
 之不可聞出師也竦懼戰或敗血託以兵少為辭耳竦言
 土兵各護鄉土自古有九地士卒近家謂之散地言其
 易離散也第以近事言之閭門祗候王文思出師敗北而
 土兵皆竄走惟東兵僅二百人殺敵兵甚衆以此知兵
 之強弱不擊東西在將有謀與無謀耳今邊郡參用東
 兵土兵若盡罷東兵亦非計也古人有言非隴西之民
 有勇怯迺將吏之制巧拙異也今防邊東兵人月受米
 七斗五升土兵二石五斗而竦乃言東兵廩給至厚又
 不知之甚也竦又言募土兵訓練以代東兵且土兵數
 萬須募足訓練雖二三歲未得成效兵精猶恐奔北豈有
 驟加訓練而能取勝哉竦議遂屈今竦奏全文已逸惟
 本傳存其大畧謹附錄於此以補其闕云

欽定四庫全書

文苑集

十五

